



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Celt

5160

15.62

Celt 5160.15.62




Harvard College Library

FROM

Prof. Fred N. Robinson





PRIS SWLLT.

GMIAD Y CAN

A

GHANJADHU ERHJL.



CAN

T.GWYNN-JONES.



1. The first part of the document is a list of names and addresses, which are arranged in a columnar fashion. The names are written in a cursive script, and the addresses are written in a more formal, printed style. The list is organized into two columns, with the names on the left and the addresses on the right.

2. The second part of the document is a list of names and addresses, which are arranged in a columnar fashion. The names are written in a cursive script, and the addresses are written in a more formal, printed style. The list is organized into two columns, with the names on the left and the addresses on the right.

3. The third part of the document is a list of names and addresses, which are arranged in a columnar fashion. The names are written in a cursive script, and the addresses are written in a more formal, printed style. The list is organized into two columns, with the names on the left and the addresses on the right.

4. The fourth part of the document is a list of names and addresses, which are arranged in a columnar fashion. The names are written in a cursive script, and the addresses are written in a more formal, printed style. The list is organized into two columns, with the names on the left and the addresses on the right.

GWLAD Y GAN

A

CHANIADAU ERAILL.



GAN

T. GWYNN - JONES.




CAERNARFON :

ARGRAPHWYD YN SWYDDFA'R "HERALD."

1902.

Clf 5160.15.62



Prof. Fred N. Robinson,
Cambridge

In Memoriam

T. E. ELLIS.

Fab cartre hud traddodiad hen, a swyn
Y fore gan a aned cyn bod co',
Roedd d'enaïd araul ynddo'i hun yn dwyn
Cyfaredd bywyd oesau Celtig fro ;
Rhoist drwy ffurfafen heddyw lachar dro,
Gorchfygaist fawredd a'th hynawsedd mwyn,
Rhoist newydd lais i hen, wylofus gŵyn,
A'r hen, hen dan i obaith newydd do,—
O ! pam diangodd d'yspryd dewr ar ffo ?
Ffo ! Nid adwaenai ffoi ! O bant i dwyn
Yn egni byw trig fyth ei effaith o,
Can's yspryd cenedl oedd nad edwyn ffrwyn !
O wreiddiau calon Cymru terddaist ti,
Rhychwennaist eithaf rhawd ei bywyd hi.

MOLAWD DYFFRYN CLWYD.

"Car sa beauté pour nous,
C'est notre amour pour elle."—De Musset.

I.

Glan wyd, Ddyffryn Clwyd! i'n clau
A chedyrn hen serchiadau
Fel erioed. Fe lwyr edwir
Dy goedydd a'th ddolydd tr
Cyn y paid bod canu pêr
Am danat. Dyma dyner
Deimladau'n bronnau. Brenin
Pob dyffryn wyt, 'rwyd lawd rhin.
Gem ar fron hen Gymru fras,
Eden werdd dan ei hurddas
Nid oedd ail o nodwedd yt—
Ba le'n werth blewyn wrthyt?
O'th gwrr eitha', ger Rhuthyn,
Hyd Ryl, ar frig gweilgi gwyn,
Wyd em y cread yma,
Bid aua' hir, bid wiw ha'.
Is gwawr haf, di wisgi'r rhos
Am y llwyni; meillionos
Lawer dardd hyd lawr y dyl—
Ol sangiad ceindlws engyl!
B'le dyry drem blode'r drain
Wenau mor lan a mirain?
B'le mae adar cynnarach
Yn y byd am gywion bach?
Delorwyr y dail irain,
Islaw'r rhod, oes ail i'r rhain?
Ar dy lasaf, frasaf fron,
Di ddygi goedydd ddigon;
Dy dderw, sawl chwerw chwaf
A rhewynt garw auaf,

Drwy'r oesau hydr heriasan'
 Heb wyro dim berr o dan
 Gadarn nerth y rhyferthwy?
 Yn yr haf addurnir hwy
 A gortho ddail—gwyrrth ydd yw,
 Têr rwydwaith natur ydyw.
 Rhed y Glwyd a'i ffrydiau glân
 Hyd wely teg rhwng dwylan
 Gyscodol, megis cadwen
 O'arian gwiw; arni gwên
 Disgywen haul; 'does gan hwn,
 A wêl afonydd filiwn,
 Loywed drych a'r Glwyd i'w ran
 Drwy wledydd daear lydan!

II.

Bro hen draddodiadau a chwedlau'n cyndadau
 Hanesion hen oesau hunasan' cyn hyn;
 Y lle yr ymdeithiai, Glyn Dwr pan ddiffeithiai
 Garn ladron anrheithiai yn Rhuthyn.

Grey draws a'i orthrymder i dristwch a thrymder
 A gwymprwyd is llymder a dewrder Glyn Dwr;
 Y costog a lusgwyd a'r castell a losgwyd
 A'i furiau a fwrwyd yn bentwr.

A Dinbych, on'd enbyd fu rhedfa'i hir adfyd
 Dan ormes creulonfryd y Norman a'r Sais;
 Y lle bu ddyfeisio a chynllwyn a cheisio
 Ein treisio a'u trawsedd a'u malais.

Ti Ddafydd ap Gruffydd! Digofaint nas diffydd
 Bar cofio'th ddiennydd—ba ddiafl yn y byd
 A'th lofrudd allase gigyddio yn unlle
 Mor erch—Och! yr hunlle dychrynlyd!

Ac yma daeth Madog a'i Gymry llygadog
 I ddial ar fradog ddifrodwyr ei wlad ;
 'Nol trechu Caernarfon a chrogi'r hen Bilston,
 Dwyn Dinbych wnai'r dewrion di-dorriad.

Pan fu'r gadfa hynod parth rhinwedd Rhosynod,
 Bythynod hen " Harlech a Dinbech bob dor "
 Rhag Siaspar a grynne, ac yntau a fynne
 Eu cynne—" Nan' Conwy yn farwor! "

Rhaid addef mai llencyn oedd Dafydd ap Siencyn
 Chwareuodd gryn brencyn a'r hen Ustus Coch,
 Ond d'wedwch wyr dawnus, oedd pranciau yr_ustus
 Bob pryd yn rhai gweddu, os gwyddoch.

Pan oedd Carl y Cynta' mewn helynt o'r brynta',
 Ac Olfyr ac ynta'n ymgeintach yn groch,
 Y dewraf o'i weision dan bob anfanteision
 Fu'r hen 'Sane Gleision, chwi glywsoch.

Ni fynnai'r hen Frytwn, er Miltwn na Mytwn,
 Roi'r castell i Bengrwn, mor bengry' oedd o,
 Heb gennad y Goron; fe'i ca'dd, neu fe ddichon
 Mai yno bae'r dynion hyd heno!

Llanelwy hynafol, bu'th eglwys gadeiriol,
 Yn gyrchfa'r annuwiol, a'r duwiol, a'r da;
 Bu hefyd, 'nol brwydyr, yn stabal a chysur
 I brysur feirch Olfyr, fawr chwalfa!

A thyna'r gyn'lleidfa amhechadurusa'
 Fu yn yr addolfa erioed, ebe rhai;
 Sut bynnag, 'rwyf gyfan; mae hynny'n werth cyfran
 Dda rwan o'r arian i rywrai.

III.

Eithr mwyn heno swyn twyn, llwyn a llannerch,
 Awel glaf hwyrnos haf glywaf i'm hannerch;
 Ynddi daw oddi draw gwynaw y tonnau,
 Yn ei bôn y mae tŷn gloesion yr oesau;
 Ynddi hi clywaf fi gadgri Caradog,
 I'm clyw tyrr hwrdd a gyrr brwydyr gynddeiriog;
 Olaf roch dolef groch y froch gyflafan
 A wnaeth "frad gwyr fy ngwlad ar Forfa Rhuddlan!"

Wele draw feiddiol drem castell adfeiliog
 Dyrch yn lew dan ei dew wisg eiddew deiliog;
 Trwm a gwyllt dremia gwg trwy'r iorwg gwyrddion,
 Dwed am ru'r arfau dur, cadau'r gwyr gyrddion;
 Hanes hynt Harri gynt, a cherynt galon
 Rhwysc y wledd pan oedd medd yn tanio 'u calon;
 Hanes mād wyr ein gwlad, cād a chelanedd,
 Godwrf pur arfau dur gwyr Owen Gwynedd.

Ond yn awr darfu gawr llafnawr llurigog,
 Heno fo huna'n fwyn dan y llwyn brigog;
 Heibio'r gaer heno'n glaer llifa'r Glwyd fywiog
 Hefo'i mwyn, bruddaidd gŵyn, lawn o swyn rhywiog;
 Onid yw hithau'n d'weyd hanes hen oesau—
 Suo lleddf hanes llid, gofid a chroesau
 Wrtho fo, gertha' falch gastell digofus,
 Ar ei thaith fythol faith mewn iaith wylofus?

IV.

A thraw o Ddyffryn Clwyd
 Af yn awr yn fy nwyd,
 I wrando'r tonnau'n cwyno'n brudd
 Alarnad dewrion gaed
 I roi eu gwerthfawr waed
 I ddial estron drais a chadw Cymru'n rhydd!

I furmur dwfn y dón
 Ar y traeth, o fy mron
 Rhyw atdeb na ddeil geiriau gwyd—
 Pe collai Cymro 'i iaith
 Am fil o flwyddi maith,
 Er hyn daw rhai a ddial ddewrion Dyffryn Clwyd

* * * * *

ARIANWEN.

(Yn null Rhys Goch ap Rhiccert.)

Gorne gwendon, gwynder meillion,
 Pefr olygon, mal ser ceinion ;
 Glan dy galon, gloes fy nwyfron,
 Gloes fy nwyfron,
 Gwae fy nwyfron !

Mwyna' gwenferch, gwynfyd annerch
 Di-ofal serch ar las lannerch ;
 Garw mor erch poen per draserch—
 Gwae wefr traserch,
 Boenus draserch !

Dere, lanwen, hoff Arianwen,
 At y dderwen laes ei changen ;
 Dwg im' deg wên, fwyna' feinwen—
 Gwae fi, feinwen,
 Gwae fi, feinwen !

Cywira'th oed ar fuandroed,
 Brys i'r mangoed draw yn ddioed ;
 Un ddraen na roed drais i'th geindroed,—
 Gwae fi geindroed,
 Dybrys, geindroed !

Y GAN A FU.

Gynt, gwelais gwcw gu
 Delore fore o Fai,
 A daeth y 'deryn du
 I wrando'i deunod chwai.

Fe ganai'r gwcw gu
 Bob bore wedi hyn,
 A daeth y 'deryn du
 Dan swyn i wrando'n synn.

Ac felly'r gwcw gu
 Bob bore bynciai'n fwyn,
 A deuai'r deryn du
 Bob dydd o'i lonydd lwyn.

Ond ffoes y gwcw gu
 Cyn pen Mehefin fwyn,
 Gan ado'r 'deryn du
 Mor unig yn ei lwyn.

Myfinnau fuais fel
 Y buo'r 'deryn du
 Yn gwrando ar gwcw ddel—
 Fu nemmor gân mor gu.

Ond buan delai'r awr
 I golli'r gwcw gu,
 A finnau wyf yn awr
 'Run dôn a'r 'deryn du.

CANU'R NOS.

Mae hafnau'r glyn yn duo
 Dan wyll cysgodion nos,
 A'r awel gref yn rhuo
 Ar waen a dôl a rhos.

Er garwed mae'n taranu,
 Er dued ydyw'r nos,
 Mae'r eos bêr yn canu
 Mewn rhwysc y'min y rhos.

Mae f'oriau finnau'n duo
 Dan ael fy nudew nos,
 Ac edyn gofwy'n suo
 O famgylch, fenyw dlos.

Er garwed mae'n taranu,
 Er dued yw fy nos,
 Myfinnau wyf yn canu
 Mal eos min y rhos.

Dy eos ydwyf, meddet ti,
 Ryw dro, fy enaid dlos,
 A thyna bam y canaf fi
 Dan niwl fy nudew nos.

* * * * *

SWYN Y WEN.

Mi welais liwus loer
 Yn gloywi cwmmwl du,
 Nes euro dunos oer
 A gwên ei gwyneb cu.

Ei delw delaid wén
 Oedd ddwfn y'mron y llyn,
 Nes daeth cymylau'r nen
 I guddio'i gwyneb gwyn.

Ond ciliai'r cymmyl certh,
 A gwridai'r lloer drachefn,
 A phefrai'i delw ferth
 Y'mron y llyn yn llefn.

A felly, f'anwyl fun,
 Doed wên i'th wyneb di,
 Daw hynny ohonno'i hun
 A gwên i'm gwyneb i.

* * * * *

NON.

Gwén ton pan torro, terwyn ei throchion,
 A thrychwyllt gynnwrf a ganna ei bron ;
 Claer a llathrwyn llethrau is lluwchion
 A llachar ôd newydd dan huan llon ;
 Glanach na'r ewyn a'r iâ yw pur galon
 A golwg f'anwylaf wên eilun, Non.

Euraid yw'r wawr hyd ororau goleuder,
 Goludog aur wawl ydyw'r heulwen dêr ;
 Glân hithau loerwen, lariaidd ei lleuer,
 Lliwus dyrch eurain derch oror yw'r ser ;
 Harddach na'u heurwedd yw'r hirwallt a dynner
 Ymdonna am wyneb fy meinwen bêr.

Pêr y cân eos yn nhywyll nos dawel,
 Diwall delori o'r dail irain a wnél ;
 Llafar rhwng deilos y dylif yr awel,
 Rhywiog yw cwrnad y corneint cêl ;
 Mwynach na'r dil, na'r delyn, a'r dwsmel
 Rhed esmwyth lais Non pan i'm dwylo'n chwim dêl.

* * * * *

DYHUDDIANT.

Paid ag wylo, Olwen dlos,
 Ddagrau ar dy ruddiau rhos ;
 Amser sy'n grymuso'r serch
 Ynnof fi, diriona' ferch ;
 Er i loesau garw lid
 Efo 'nghroesau ddeifio 'ngwrid,
 Un yw'r galon hon o hyd,
 Tyner byth er bryntni'r byd ;
 Megys y'mhlentyndod gynt
 Pan wrandawem swyn y gwynt
 Yn y coed yn canu cân
 Efo myrdd o ader mân,
 Ac y llamai'th galon di
 Fel y llamai 'nghalon i ;
 Felly byth er gwaetha'r byd
 Y mae 'nghalon i o hyd.
 Paid ag wylo, Olwen, mi
 Rof y cwblw erot ti.

SERCHGAN.

Perlog geinwrid gwynros perthi,
 Wyrif wâr, a chwâr pan chwerthi
 Ar dy lednais wedd aneisior,
Mwynder hafal hefin dymmor ;
 Lliw ewyndroch tón aflonydd,
 Gorne manod gorwyn mynydd.
 Esmwyth ddwyrudd, ceinros rhuddain,
 Gwythi gwaed ar fynor disglain ;
 Rhuddgoch wrid y nef yw'th wefus,
Mal y mafon, mal y mefus !
 Gwallt dy ben ymdonna'n lleani,
 Eurwawl heulwen ar y lili.
 Is mireinfrig ros marianfryn,
 Cân y gân a ganet, wenddyn,
 Flwyddi'n ol cyn inni brofi
 Dygyn bryder llwybrau gofid.
 Hardd y chwardd pob llannerch werddlas,
 Uchel goetlwyn ; fersch lygatlas,
 Eirioes lennyrch y rhoslwyni
 Ddycan' groeso etto itti.
 Cân y gân a genit, honno
 Yrr y galar hir i gilio—
 Honno gyfyd hen adgofion
 Pêr hen amser yn fy nghalon.

* * * * *

BETH ?

Y'nghanol y grug ar y mynydd maith
 Gorweddais i lawr, a'm llygaid yn llaith.
 Meddyliais glywed murmur y don
 Yn galw, a deffro rhyw boen yn fy mron.

Ar draeth y môr y'murmur y lli,
Gorweddais, a gwên ar fy ngwyneb i.

Meddyliais weled y grug bach llon
Yn galw, a deffro'r boen yn fy mron.

Ar hwyrnos auaf wrth dân o fawn,
Gorweddais, a'm llygaid o gwsc yn llawn.

Breuddwydiais wel'd haf ar y grug a'r don
Yn galw, a deffro'r boen yn fy mron.

Y'nghanol tîodi, angen, ac aeth,
Y dagrau'n llif i fy llygaid a ddaeth.

Tybiais wel'd golud a mwyniant llon
Yn galw, a deffro'r boen yn fy mron.

Y'nghanol dedwyddyd, golud, a bri,
Llawenydd a lanwodd fy llygaid i.

Ond teimlwn ryw awch nas diwallai'r byd
Yn galw, a deffro'r hen boen o hyd—
Y boen yn fy mron o hyd, o hyd.

* * * * *

PAID AG WYLO, TAW A'TH GWYN.

Pan yr wylwn gerdd allwynin
Chwerw, ar yr unig ros,
Clywais lais o frig y llwyni'n
Galw arnaf fin y nos;
Ebai'r llais yn wan, grynedig,
"Paid ag wyllo, taw a'th gwyn!"
Minnau syllais yn synedig
Tua'r llannerch yn y llwyn.

Huliai deilos gwyrdd y llannerch,
 Llanwai blode pêr y lle,
 Man y clywais lais i'm hannerch,
 Llais a ddaeth o wynfyd ne';
 Darfu'r byd a'i ddig ymryson
 I'w anialwch crâs fy nwyn,
 Ond mae'r llais yn galw'n gyson—
 " Paid ag wyllo, taw a'th gŵyn! "

Mae blynyddau wedi myned,
 Ymaith ffoes ieuenctid glân;
 Ar fy mhen mae gwallt cyn wynnied,
 Lawer un, â'r eira mân;
 Aeth gwrthrychau'r byd yn salw,
 Nid oes yn ei bethau swyn,—
 Ond mae'r llais o hyd yn galw,—
 " Paid ag wyllo, taw a'th gŵyn! "

Cyn bo hir daw llaw marwolaeth
 Im' i roi anadfer glwy',
 Gofid wywodd fy mabolaeth,
 Angau wywa'r cwbbwl mwy.
 Mae'r distawrwydd yn fy llethu,
 Ond mi glywa'r geiriau mwyn
 Gyda'm galar yn ymblethu,—
 " Paid ag wyllo, taw a'th gŵyn! "

* * * * *

GEM.

Em dlos, y mae dy lais i mi
 Mal alaw hofi'mél awel haf
 A wyla'n glaf drwy lwyn y glyn
 Ar ol y glaw.

Felusa' lais! Fel isel lef
 Y don, yw ef, pan daeno hi
 Furmuroi lif o'r môr i lân
 Freuddwydiol haf.

Anwyled yw! i'm nol y dêl;
 Y galon gél, fe'i geilw'n gu
 O feiau lu, a'i ddwyfol iaith
 Ddyfala hi.

O, felus su â'i ddwyfol swyn
 A ddél i 'nwyn o'r ddyla' nos
 I wenwawr glos, i awyr glir
 Calonnan glân.

* * * * *

CYSUR BYWYD.

Llafur a lludded,
 Gofid a chroes,
 Rhyfedd cyn brudded
 Ydyw ein hoes;
 Ambell air mwyn,
 A myrdd o rai sur—
 Curio dan gŵyn
 A chwyno dan gur.

Llawen obeithion
 Heddyw y sydd;
 Dioddef arteithion
 Fory a fydd;
 Cysgod yw bod,
 A breuddwyd yw byw;
 O b'le 'r ym ni'n dod—
 B'le 'r awn, druan ryw?

Eto, er blynged
 Hyd ein berr oes,
 Ydyw ein tynged
 Chwerw a chroes,
 O boppeth hardd
 Ac o boppeth mwyn
 Rhyw wynfyd aur dardd
 Er i ni fedru 'i dwyn.

* * * * *

GWGLAD YR AWENAU.

Gwlad yr Awenau ! Gwalia dirionaf,
 Mwyn yw dy swyn dan wrîd hyfwyn yr haf.

Gwyrddion dy ddyl ac heirddion dy ddeilos,
 Fore hin hefin, mor iesin dy ros.

Gorwyrdd marianfryn, mireinfrig llwyni,
 Melodus cerdd d' adar, llafar twrf lli.

Gloyw dy nentydd dan anterth huan,
 Lle dylathra mill hyd dy lethrau mân.

Gad immi ddwad o ddŵch y ddinas
 I arogledd a gwllith dy weirgloddiau glas.

Lle dawns morwyndod mireindeg anian
 Dan berlau'r gwllith—dyna barlwr glân !

Iechyd di gŵyn sy'n byw rhwng dy lwyni,
 Gwynfa'm mabandod, mae'm bendith i ti.

Wela rodd Ior ryddiriwn hyd ddiwedd—
 Canu dy glod byth ac ynnod gael bedd.

Gwan awel hwyrnos a gwyno alarnad
 I mi, nos fy nghloi y' mynwes fy ngwlad

MORFUDD.

Llifai dwfr y Ddyfrdwy lafar
 Heibio hen leiandy prudd,
 Llifai, gan drymeiddio afar
 Calon fu mor llon a'r dydd ;
 Dan y llwyni pêr, garlantaidd,
 Crwydrai un, a'r defion santaidd
 Fel cadwyni adamantaidd
 Yn ei gwasgu nos a dydd.

Cathlu yno 'roedd yr eos,
 Cathl foddus, felus, fwyn,
 Ond i bleser ni fydd lle os
 Llawn fo'r fynwes hefo chŵyn ;
 Felly crwydrai'r lleian wirion
 O dan frigau'r coedydd irion,
 Ac ni chlywai'r ganiad dirion
 Ganai'r eos yn y llwyn.

"Dychwel Forfudd !" oedd y geiriau
 Brudd adseiniai yn ei chlyw,
 Blode meirwon oedd y creiriau
 Wasgai at ei chalon wyw,
 Blode gwyllt fu'n tyfu'n irion
 Gynt ar odre'r Berwyn tirion,
 Ac a gadwyd fisoedd hirion
 Er fod myrdd o flode byw.

Syllai ar y rhos gwywedig,
 Gwelwach aeth ei gwelw wedd,
 Megys golwg y siomedig
 Pan syrth gobaith idd ei fedd ;
 Fel yr haul ar fore dylaidd,
 Gwenodd wên a ddarfu'n bylaid ;
 Ar ei gwyneb trist, angylaidd,
 Angau roddes wên o hedd.

Daeth yr holl leianod santaidd
 Yno gyda goleu'r wawr,
 Ac o dan y llwyn garlantaidd
 Rhodded Morfudd dlos i lawr.
 Ond mae un yn crwydro, crwydro,
 Fyth a'r stormydd oll mae'n brwydro,
 Fyth mae'n ceisio'r beddrod llwydro
 Lle rhoed Morfudd dlos i lawr.

* * * * *

DEIQ 'R GWAS A BETTI 'R WAEN.

(Yn ol "Abner and the Widow Jones," Bloomfield,
 a chwedl ei chanu yn nhafodiaith Dyffryn Clwyd.)

"Wel ! gafr a'm 'sgubo'i, dene ben ;—
 Wo, Captyn ! hel dy hegle 'mlaen ;
 Mi af y fory, doed a ddêl,
 I drïo'r weddw bia'r Waen.

"Am wedd o 'bolion teirblwydd clên,
 Ma' mistar braidd yn cadw swm,
 A 'ngwas i, mi'r wyt ti'n rhy hên
 I ddim ond myn'd yn fwyd i'r cwn.

"On' tawn i'n medru 'hennill hi,
 Mi cadwn di rhag tro mor arw ;
 Caet gerch a phorthiant iawn gen i,
 A byw—wel, wel, nes byddet farw !

"Ai tybed rhaid dy saethu di,
 A chwalu d'esgyrn, ol a blaen ?
 Na raid, myn gafr ! pe 'nghrogid i—
 Os medra'i ennill gwraig y Waen !

A ffwrdd a fo, a'i glôs pen glin,
 A'i wascod lewis newydd spon ;
 Fu Dei, wrth groesi draws Cae Llin,
 Yrioed mor dw't a'r nosweth hon.

A dechre deffro yn y man
 'Nae'r cariad yrre Ddei o'i go',
 Pen ddaru streuon clepie'r llan
 Gynt beri i Fetti 'wrthod o.

Ond p'run oedd Betti, ar y slei,
 Yn ddistaw bach, 'rol claddu'r gŵr,
 Yn codi'i bys, fel tae, ar Ddei,
 'Does neb a feder dd'eyd yn siwr.

Sut bynnag, fel 'roedd Dei yn hel
 'I brennie traed ar draws y fron,
 Mi 'gwelodd Bet, a'i gwyneb del
 Oedd weithie'n sad ac weithie'n llon.

Mi glywe Betti sw'n 'i droed,
 A fynte'i hun ar hynny'n d'eyd—
 (Aeth hithe'n gochach nag erioed)—
 " Hei! Betti Gruffydd—sut ma'i'n gneyd?"

A chwedyn hi roth hanner tro,
 Ond colli'i gwynt y teimle'i hun ;
 A phengam ffreue'r adarn to
 O'r bargod tew, wrth weld y dyn.

Mi 'steddodd Dei yn ddi-ymdroi,
 A phenderfynnodd, clên ai croes,
 I ddeyd 'i feddwl, doed a ddoi,
 'Ran, dene'i ffordd ar hyd 'i oes.

Mi gydiodd yn 'i llaw hi'n dynn—
 Mi ddalie'r fainc gryn wyth ne ddeg—
 A dalltodd Betti gyda hyn
 Fod Deio am roi cynnig teg.

O Betti anwyl! gad i mi
 Ga'l d'alw fel'na 'rol 'mi ddod,
 Ran, er nad fi y'th bia di,—
 Ar bwy bu'r bai?—fi 'lase fod!

"A'th hynny, do, ond, diawch! mi d'rewis
 I feddwl eilweth, a 'bre fi,—
 Os prioda'i byth, y neb 'na'i ddewis
 A fynna'i'n wraig—be ddyliet ti?

Pan oeddwn i, brynawn ddy' Llun,
 Yn troi taleri'r hen Gae Glas,
 Deng mlynedd, 'berwn wrthyf f' hun,
 Fu's yn yr Hendre Ddu'n ben gwas.

"A rwan, dyma Fetti'n rhydd—
 Mi alle nghofio fi o hyd—
 Mi ceris hi am lawer dydd,
 Be ddaw? 'Does w'bod yn y byd!

"'Ran, hwrach 'r eiff y tipin tir
 Sy' gynni'n llanast llwm di lun,
 A hithe'n dlottach cyn b'o hir,
 A cholli'i chartre 'neiff 'i hun.

"Ac hefo'i thy a'i thir 'i hun,
 Mor daclus fydden ni yntê!
 A phwy gae Fetti ond y dyn
 A'i cadwe ac a drine'r lle?

"A 'ngeneth wen i dene pam
 Y dois—nid fi ddoe i ddim byd,"
 Mi gochodd Betti fel y fflam,
 A 'dryche ar y llawr o hyd.

Mi roth 'i phen as ysgwydd Dei,
 Dan sobian yn 'i balchder synn;
 A medde fynte, "Bet! mi 'nei
 'Y nghymryd!"—dan 'i gwasgu'n dynn.

Am gwilidd soniodd Bet, ond be
 Oedd 'nelo cwilidd hefo rhei
 Na 'naen ddim ond peth yn 'i le
 Yn weddus, megis Bet a Dei?

A thwmodd Deio at 'i waith,
 Wrth feddwl am 'naill beth a'r llall,—
 "Mi 'dweunost Captyn?—wel, y ffaith
 'Di fod o'n myn'd yn hurt a dall.

"A phe cyttunwn i a th'di
 I fyn'd yn wr a gwraig yn fuan,
 Ni fedret byth mo 'nghymryd i
 A gwrthod lle i Gaptyn, druan?

"Mi prynna i o—cheiff 'run ci
 Byth siawns i larpio'r fath hen ffrynd;
 Fydd o ddim byw'n hir iawn, ond mi
 Geiff gwbwl chware teg nes myn'd.

"Wrth garthu rhych ne agor cwys,
 Mi fydde Captyn, deyd y gwir,
 Yn myn'd yn drin-gar wrth 'i bwys,—
 Fu 'rioed 'i well a'i draed ar dir!

"Mor ffres a 'deryn fydde fo
 Wrth fyn'd i'r maes ben bore gynt;
 A chwedyn, dan y drol, ar dro,
 Mi dynne, 'ngwas i! tel y gwynt!

"Mi fuo'n geffyl rhadlon, braf,
 'I flew o'n llyfn a'i 'lode'n syth;
 Mi ae fel cloc drwy gydol dydd,
 Be? chwip?—ni fydde'i heisio byth.

"Mi g'dawd o dan y drol un tro
 Ar ol dadfachu'r lleill bob un,—
 Mi 'drychodd mor druenus, do,
 A chwedyn, a'th a'r llwyth 'i hun!

"On' tawn i'n dal drw'r nos i ddeyd,
 Ddown i ddim i ben 'run mymryn cynt;
 Ond, Betti, d'wed be w'ti am 'neyd,
 Ne waeth 'mi heb ddyfetha 'ngwynt.

"Cym' fi a 'ngheffyl ne 'nte baid,
 Mi gest y gwir, dim mwy na llai,
 A gwir fâg wir, ma' hynny'n rhaid,—
 Os heua'i wenith, gwenith ga'i."

"Ie, Dei, ond meddwl am y stŵr
 A godith pobol, a'r chwedleuon,
 Er, hwrach, wedi 'mi gael gŵr,
 Na ddylwn wrando'u stŵr na'u streuon.

"Mi wn am danat ti'n dda iawn,—
 Mi 'd'faris d'wrthod lawer tro;
 Wn i ddim etto sut y g'nawn,
 Ond am 'rhen Gaptyn, ty'd a fo."

"Wel, bendith itti 'ngeneth wén!"
 'Bre Dei tan neidio ar 'i draed,
 'Ran, 'roedd hi'n myn'd yn hwyr dros ben,
 A chychwyn tuag adre 'naed.

A braich y' mraich, âg ysgafn droed,
 A'th Bet i ddanfôn Dei gryn gwrs;
 Fu dim dau dderyn, naddo 'rioed,
 Mor lôn a nhw tra'n myn'd trw'u 'sgwrs.

Mi g'reuddodd Dei i'r Hendre'n llôn,
 Ond pan yn nrws y gegin lanweth,
 Mi 'na'th fath wep, a chêg mor gron—
 'Roedd raid i Gaptyn gychwyn dranweth f

"Wel, wel," 'bre Dei, "waeth pryd daw'r tro
 I'w ladd, fydd arno ddim i chi;—
 'Does dim i'w 'neyd ond myn'd a fo,
 Fel tae, os na chym' Betti fi."

Gadawse Fetti'n hwyr y nos,
 Ar hanner gaddo, fel pe tae,
 Ond cin bod haul yn g'leuo'r rhos,
 'Roedd Dei drachefn yn croesi'r cae.

"Be 'tae hi'n troi a 'ngwrthod i?"
 Sibryde Dei, bron myn'd o'i go',—
 "Be fydd 'rhen Gaptyn dda i mi—
 Heb wraig na thir, be 'na 'i a fo?"

O gamfa i gamfa, gwrych i lwyn,
 Y rhoncie Dei drw'r branar blin,
 Dan gyfri 'i bres, a 'wysg 'i drwyn,
 Ai weithie i ddwr at ben 'i lin.

"Mi geisia fenthig!" ebre'n synn—
 "Captyn! rhaid i Bet d'arbed di,—
 Gre dures glên!—be', benthig cyn
 Cael gw'bod ddaw hi'n wraig i mi?"

"'Di merched ddim am siarad plaen,—
 Mi gadwa'i'n lle sut bynnag 'r eiff hi;
 'Na'th hi ddim gaddo rhag 'i blaen,
 Er hyn, mi fentra ddeyd y g'neiff hi.

"On' tra b'dda i fan yma'n llercian
 Ne wibio fel rhw hurtyn ffol,
 Mi all 'rhen Gaptyn orfod hercian
 I ffwr! Mi gwadna i hi'n fol!"

Drw' rwbel tew o ddwr a chlai
 Y scawtie Dei o chwith i dde;
 Pe'n ddyn a'i gariad hanner llai,
 Mi chwilse, siawns, am lanach lle.

Daeth bore braf, a thán 'i chwys,
 'Roedd Dei'n branaru Pant y Wrach,
 Pan wrth 'i fistar, hefo brys,
 Y mentrodd ddeyd 'i secured bach.

Mi ddechrodd arni'n berffeth ffri—
 " 'Dwi am briodi—'sgalla'i—'n fuan,
 A mistar, deydwch wrtha i,
 Faint gym'rwchi am 'rhen Gaptyn druan?

" 'Ran, neithiwr, gaddodd Betti'r Waen,
 Bron iawn, y cymre hi fi'n ŵr;
 'Di'r hen geffyl yn werth mo'r ddraen,
 Ond eisio 'i arbed s'gin i'n siwr."

" Be? Captyn? Dei! myn diawst i, 'does
 Dim siawns y tâl o fawr i mi;
 Ma'r hen bry bron ar ben 'i oes—
 Mi gwertha'i o'n rheit rhad i ti."

Daeth amser 'madel gyda'r nos,
 A thalwyd cyflog Dei yn llawn,
 Ac ebre 'i fistar wrtho—" Dos
 A Chaptyn, was—pob peth yn iawn.

" Ma' itti groeso 'honno fo,
 'Ran, bu'st yn was da iawn i mi;
 'Dwi'n amme dim na 'nei di'r tro
 Yn ŵr y Waen—lwc dda i chi!"

Mi ddôth y m'rynyon ar u râs
 Dan chwifio ffedog, llaw, a het,
 I ganu ffarwel â'r hen wâs,
 A deyd lwc dda 'ddo fo a Bet.

Mi chwifiodd ynte 'i het wrth hel
 'I dacle 'i gid, a rhedodd twrr
 O blant, dan weiddi, " Dei, ffarwel!
 A Chaptyn, ma' nhw'n myn'd i ffwr!"

A thoc mi ddoed i ben y fron
 Gyrheudde i lawr at ddrws y Waen;
 A medde Dei, dan wenu'n llôn,
 " Ty'd, Captyn, gad 'ni fyn'd y'mlaen."

Mi cwarfodd Betti nhw amor fwn,
 A 'gorodd ddrws y stabal fawr,
 A chynted tynnodd Deio'r ffrwyn,
 Gorfeddodd Captyn ddall i lawr.

Di Fuddugoliaeth! o'r llawryfon
 A gedwi i bobol wych eu grven,
 O, arbed un, o blith eu llyfon,
 I Ddeio'r gwas a Betti'r Waen!

* * * * *

GWLAD Y GAN.

*Cyhoeddwyd y ddau ganiad blaenaf o'r ddychanagerdd hon y'
 "NGHYMRU," y caniad cyntaf yn rhifyn Rhagfyr, 1896, a'r
 ail yn rhifyn Ebrill, 1897. Cyhoeddwyd hi wedi hynny y'
 "MHAFUR PAWB," a thrydydd caniad wedi ei chwanegu attî.
 Yr wyf yn ei dodi yma am fod amryw yn dymuno ei chael i
 gyd hefo'i gilydd.*

Y CANIAD CYNTAF.

Fe'm ganed i'n Hen Wlad y Menyg Gwynion,
 Gwyllt Walia, Cymru Wén, neu Gymru Lân;
 Fe'i henwir hi wrth fel bo tuedd dynion,
 Neu'n llawer amlach fel bo odl cân:
 Nid dyna'r oll o'i henwau chwaith, can's da oedd
 Gan rai ei galw'n Wlad y Breintiau Mawr,
 A Gwlad y Bryniau, Gwlad y Cymanfaoedd,
 A Gwlad yr Eisteddfodau; wele! 'n awr
 Y mae—wrth gofio, Gwlad y Gân a'r Cenin—
 Ei henwau amled bron a rhai cyw brenin.

Mae'i beirdd lliosog megys—megys—megys—
 Wel, megys dail yr hydre'n Vallombrosa—
 (Mae hon, gan henaint, yn gymmariaeth fregus,
 Ond am gywirdeb, hi'n ddiau 'di'r 'gosa') ;
 'Does lân na phentre heb ei fardd a'i lenor,
 Y naill " o fri " a'r llall yn " wych " gyfrifir—
 Mi hoffwn wel'd y gwron a ddarllenno'r
 Cynnyrchion oll, a byw—fel tae, yn ddifyr;
 A wnel heb—(gwyddoch be'), rhoer iddo bob
 Rhyw glod a roed hyd hyn i 'fynedd Job.

Gan na chae'r beirdd gynt yn yr Eisteddfodau
 Mo orsedd clod yn union fel dymunen',
 Hwyr ddychmygasan' luaws o ddefodau,
 A gwnaethan' Orsedd iddyn' hwyr eu hunen ;
 Prif gampau'r Orsedd ydyw gwersi 'i rheithiau,
 Hi fydd gywrsail pan fo'r glec yn galw,
 Gwna'r troi'i chysylltu gydag arswyd weithiau,
 A thal hygarsyw (er mai camp go salw
 F'ai honno) ; felly 'mlaen ceir mynd yn nes
 Eir drwy bob gair ag ynddo g, r, s.

Drwy gymmorth gau filolog (cofiwch swnio
 A dallt y gair hwn megys petych Ffrancod,—
 Ys gwn i ellir drwy ryw foddion bwnio
 I bennau gwyr y wasg, a beirdd, a chrancod
 Fod rhaid i'r iaith Gymraeg, fel pob iaith, dyfu ?)
 Drwy gymmorth gau filolog rhith-ddysgedig
 A brofai boppeth fel y bae'n deisyfu,
 Cawd hyd i swydd hynafol, gysegredig,
 Archdderwydd, math ar farddol dad gyffeswr—
 (" Un wna i eirch derw," meddai rhyw broffeswr).

Mi 'dwaenwn un Archdderwydd tra defodol
 Na 'steddai byth—o leia', ni chadd gader
 Erioed ;—gwr da'n ddiau, a chydwybodol,
 A gredai Iolo fel y credai'i bader ;
 Ei wallt a'i lais, y ddau yn llaes, gadwynog,
 Oedd brif o'i gymmwysderau, mae'n ddi-lys ;
 Ni wnaeth erioed beth gwell na lladd ar "Iwynog,"
 Na gwaeth na thrwsio Salmau Edmwnd Prys ;
 Fe fedrai Prys Gymraeg diall, a chwipyn
 Y rhaid cyfaddef, meddai'r Derwydd—dipyn.

Fe ddaeth ryw ddydd i bennau'r beirdd ('roedd yno
 Ddigonedd o le gwag) nad ydoedd maint
 A bri eu Gorscdd ddim yn llawn a chryno
 Heb wisg i bawb, yn ol ei radd a'i fraint ;
 Fe gaed hukanau glas a gwyrrdd,—rhaid adde
 Mai cyson fu'r madrondod yn ei gais
 I ddewis lliwiau weddai i bob gradde—
 Y cwestiwn yw, p'run wyrdda'r bardd ai'r bais ?—
 Rhod i'r Archdderwydd benwisg bigfain arw,
 Ddigantal, ac fe'i gwisgodd—a bu farw.

Wrth fraint a defawt, penwyd ei olynydd
 Ac ni fu son am ddim ond un yn pwdi ;
 Fe waeddai crwt o Sais ar ochr mynydd
 Y Gogarth—"Dad ! see Punch up there ? where's Judy ?"
 Ni wyddys beth lefara'r bardd os dywed
 Neb wrtho ddweyd o'r estron air cyn erched—
 Fe ddwedodd unwaith, do'n wir, fod o'n clywed
 Pêr "swn y delyn yn sandalau" merched ;
 Beth fai byddaru'r crwt â swm "Niagara ?"
 O bob rhyw gosp, fe fyddai hon tua'r hagra.

Ac fe geid berw croch a thwrf Niagara
 Heb fyned " Dros y don " a'i lluwch aflawen,
 Mewn rhes o ryw englynion dynnai ddagra'
 O lygaid Cymro garo'i iaith a'i awen ;
 Ac oni fyddai hynny ddigon caled,
 Darllenner " Ber-awdl " eisteddfodol hefyd—
 Mae honno cyd a'r " Flwyddyn," a chyn saled
 Y gwnai'r gwrandawr a phetae arno glefyd ;
 Chwaneger toddaid (er mwyn lladd y lleban)
 Ddwg " dyrau " ddwywaith y'mhob un o'r chweban.

Mae dyddiau'r pethau hylwys, hoywliw, hylon,
 A gwiwlon, gwiwlwys, wedi darfod bron ;
 Ceir ambell un o gwmpas yr ymylon
 Yn canu i'r " Eisteddfod hynod hon ;"
 Ond geiriau fel " nos-dirol anhawsderau,"
 Neu fel " Crist-debyg wron " bia'r maes ;
 Gwneyd hyn yw'r pennaf oll o'r cymmwysderau,
 Oddigerth, hwyrach, wisgo'r gwallt yn laes,
 A mynd trwy arholiadau mewn gwybodaeth
 Am lyfrau na phrynn neb ond drwy orfodaeth.

'Does ryfedd fod y beirdd mor ddiramadeg,
 A difarddoniaeth o ran hynny, canys
 Pwy glywodd son am wenith unrhyw adeg
 Yn tyfu mân na heuwyd dim ond manus ?
 Er engraipt, 'studio awdl ar " Glawdd Offa,'
 Ei geiriau, hwyrach, o'r tu yma'r clawdd,
 A'i phriodebion, druain, am y cloffa,
 Oll o'r tu arall ; na, nid gorchwyl hawdd
 Yw dysgu iaith yn gywir oddiwrth un
 Aeth yw 'scrifennu cyn ei dysgu 'i hun.

Mae'n wir fod Fyrsil gynt wrth ddechreu prydu
 Yn dwedyd "canaf" (yn y gwreiddiol *cano*,
 Os ydyw'm Lladin i yn peidio rhydu—
 Sut bynnag, gwn, chi welwch, beth am dano);
 Am hynny barnodd un o'r beirdd Gorseddol
 Y medrai yntan ganu arwrgerddi,
 A chanodd amryw bethau hir ryfeddol,
 (O char ei wlad, gwael na ddistewai erddi):
 Ond ni wneir rhigwm maith o'r math trwstanaf
 Yn gerdd awyrain â'r ymadrodd "canaf."

Mae gan un bardd gryn ddeuddeg o gadeiriau,
 A llawer mwy na hynny o genfigenwyr;
 Mae'n wir ei fod o'n gawr am glecian geiriau,
 Ond amlach ei gadeiriau na'i ddarllenwyr;
 Un arall sydd a'i esgyll yn ymledu
 Nes swyno'r beirniaid agos hyd wirioni,
 Ei bennaf fai yw fod o'n cwblw gredu
 Fod rhaffu llawer 'run peth a barddoni;
 Er, eddyf yntau weithiau yn ei gân,
 Yn onest braidd,—“trugaredd wnaiff y tân.”

Un eto gân, ac eiddo'r Canol Oesau
 Yw'r orgraff ddilyn ef i raddau pell;
 (A ddaw i'r orgraff derfyn ar ei chroesau,
 Amgen na'i gwneyd yn waeth a'i galw'n well?)
 Fe gân—yn awr, gofelwch am eich genau—
 Am “sidan-awelon” (frifodd neb, gobeithio?)
 Yn fynych italeiddir y llythrennau
 I ddangos y Farddoniaeth a'i pherffeithio;
 Rhyfeddsw'n innau, fel y gwnaeth y nef,
 Pe clywswn “delyn” ganai “anthem gref.”

Nid dyna chwaith yr oll o ryfeddodau
 Y beirdd, mi fedrwn nodi rhai myrddiynnau
 O bethau rhyfedd, gyda l-au
 I ddangos eu rhyfedded ; mae'r testynnau
 Yn fynych iawn yn llawn o ddiwinyddiaeth,
 A metaffyseg, dim byd, ac athroniaeth,
 Morwriaeth, gweniaith, ochain, a seryddiaeth,
 A phoppeth drwy'r bydysawd, ond barddoniaeth
 Am iaith, mae'r beirdd yn hyn yn fwy o drethwyr
 Ar 'fynedd dyn na phawb, ond y pregethwyr.

Aeth nifer mawr " tuhwnt i'r llen " eleni—*
 A gwae eu dod yn ol o'r fro gyfrinol ;
 Y flwyddyn nesa' ceir, mae'n debyg genni,
 Draithodau ar " Frawdoliaeth Gyffredinol : "
 Pwy fyth ar ryw gynghanedd feder blethu
 Y ddeuair sydd hyd seithsill yn ymestyn,
 A rhaid fydd gwneyd rhag ofn i rywun fethu
 A dirnad beth a ddichon fod y testyn ;
 Peth cās yw darllen awdl heb un syniad
 Beth oedd ei thestyn hi ar ei chychwyniad.

Mae meddwl am y darnio a'r llurguno
 Fydd ar yr hen Gymraeg bron iawn a gyrru
 Y sawl a'i câr i ddeisyf a dymuno
 Cyflafan arall. Gwarchod ni, 'r pentyrru
 A fydd ar eiriau gweigion at eu gilydd,
 A'r difrod erchyll wneir ar ryfeddnodau :
 Ac wedyn, wrida neb o'r beirdd gan gwilydd,
 A chaiff un gadair am ei holl bechodau ;
 Ond hwyrach na cha'r wlad mo'r traithawd gorau,
 Os felly fydd, bendithier y pywllgorau.

* Flwyddyn Eisteddfod Llanduċno (1896) y gwnaed y gan hon

Rwy'n byw y' Ngwlad y Gân, fel d'wedais gynnuau,
 Ond, 'rhoswch—Enid ! onid heno, dywed,
 Mae'r prifardd Pendew'n dyfod a'r rhimynnau
 A eilw'n " Awdl," gael i mi eu clywed ?
 Ai ê ? O, 'r nefoedd ! dacw fo ar y gair—
 Beth ? clo ar y ddrws y cefn ? Wel, brysia agor ;
 Mi ddof yn ol y' mhen dwy awr neu dair,
 (Aed ef a'i awdlau—hym l—os erys ragor) ;
 Dwed wrtho, Enid, 'dwyf fi ddim yn iach—
 Mi af i'r dre i weld y " ffyle bach."

YR AIL GANIAD.

Er gwaetha'r cwbwl, 'rwyf yn byw a chanu—
 Nid ar fy nhir fy hun ychwaith, ysywaeth—
 (Ni feddaf lath o dir, er mod i'n hannu
 O deulu gynt fu enwog am ei gywaeth) ;
 A byw go fain i Gymro yw llenora,—
 Ni chai gefnoctyd ond un arwynebol
 Pe d'wedai'i feddwl yn yr iaith ragora'
 Os na thrydd at " lenyddiaeth gyfundebol ; "
 Os hynny wna, bydd " awdwr dylanwadol,'
 A'i ganmol wna pob papur bach enwadol.

Wrth feddwl am bapurau, mae digonedd
 Ohonyn' hwy ar hyd a lled y wlad ;
 Ni fynwn i gynhyrfu mo'u digllonedd,
 Can's enbyd fyddai hynny, pwy a wad ?
 Peth eitha fyddai llochi'r golygyddion,
 Ond dweyd y gwir a raid i mi, pe digien ;
 Am add yr iaith 'does odid well cigyddion,
 A chofio 'u bod yn cael cryn ddeg ar hugien
 O syltau yn yr wythnos am eu gwaith
 Gan rai ŵyr lai na hwythau a n y aith !

Y' mlaenaf (fel y dywed y pregethwyr),
 Cyfeiriwn (fel y dywed gwyr y wasg),
 At waith y golygyddion, prif ddifethwyr
 Grammadeg, inc, a phapur ; penna' dasg
 Y rhei'n yw trosi barn papurau'r Saeson
 O Saesneg gweddol i Gymraeg echrydus ;
 Mi wn y ffraean' eto fel y ffraeson'
 Am immi fentro dweyd y gwir adfydus,
 Ond caraf Gymru gystal ag un dyn,
 A dwedaf, dylai ddweyd ei barn ei hun.

Hwy wnan ar ambell fater cartre felly
 (Y golygyddion wy'n olygu'n awr),
 A garw dosted hefyd yw'r fflangellu,
 A'r cynnwys bychan gymmer le mor fawr :
 Rhaid dweyd " yr ydym eisoes wedi dwedyd "
 Yn lle " dwedasom "—waeth mo'r llawer beth,
 Can's nid yw'r peth a ddwedwyd nemor gredyd
 I undyn ond i 'fynedd mawr di-feth
 Y sawl ddarllenno'r oll heb —wel, heb wneyd
 Y peth na waeth i mi heb drwblo 'i ddweyd.

Yn nesaf (dyna ddull y pulpud etto),
 Mae gennym i gyfeirio (dyna ddull
 Y wasg, a gwae i'r truan a ddywetto
 Ddim yrr ohebwy'r hon i dymmer hyll) :
 Beth ddwedais?—O! mae gennym i gyfeirio
 Yn nesa' peth at waith y gohebyddion ;
 Maen' hwy fel peten' wedi ymgyngreirio
 I wneuthur a ddylasai'r golygyddion,
 Sef gwneyd sylwadau ('n mesur tua throedfodd
 Ar flaith na fesur fwy na chwarter modfed.).

Os digwydd rhywun digon dinod farw,
 Yrwan, bobol anwyl! am ohebu;
 Fe geir colofnau am y golled arw
 (Nid dwl o dro a fa'i eu hystrydebu,
 Arbedai dalu cyflog i'r cysodydd);
 Yr oedd y sawl fu farw 'n wir Israeliad,
 Yn Nasaread, pen pob cyfarfodydd,
 Tywysog mawr yn Israel, a chaffaeliad
 I'w ardal, a "derbyniwr cyson hefyd
 O'r papur hwn" (gnawd ddwyn o hynny glefyd).

Ar ol rhoi hanes maith a thra gwasgarog,
 Gweddio mae'r gohebydd yn doredig,
 Fo erfyn, "Bydded nawdd y Nef drugarog
 I'r weddw a'r amddifaid trallodedig;"
 Fo ddywed hefyd, "Gyfaill anwyl, huned,
 Nes byddo dorau beddau'r byd yn agor,
 A gwyrdd fo'i fedd," deil atti i ddymuned
 Cyffelyb bethau, ond ni ddwedaf ragor
 Heblaw fod gweddi'n eitha i bechadur
 Cyhyd na ddodo hi mewn "newyddiadur."

Pan rydd gohebydd gwrs o'i farn ei hunan
 Y' nghylch cwrdd te neu am ryw gwrdd llenyddol,
 Bydd amryw yn yr ardal na chytunan',
 A dyna ryfel doniau gohebyddol:
 Bydd un yn galw'r llall yn anwybodus,
 Yn llawn o ragfarn ac o lid maleisus.
 'Scrifenna'r "llenor gwydh" a'r "bardd hygloodus"
 Golofnau i dd'wedyd a ddywedwyd eisys,
 A'r "Gol." a dd'wed y' mhen rhyw flwyddyn gron,
 "Boed hyn yn derfyn ar y ddadl hon."

Ond wedi'r cwbl, rhaid cael "copi" rywsut,
 A chan fod hwn, ran amla, 'n "gopi" rhad,
 Wyr gŵr y papur newydd yn ei fyw sut
 I dalu am newyddion tref a gwlad;
 A thyna'r holl bapurau Seisnig, wel,
 Mae'r rheini'n cwblw loffa pob newyddion,
 A rhatach fil na thalu am eu hel
 Yw talu tipyn bach i gyfieithyddion;
 Os papur Sais dd'wed "John Jones sang," peth anodd
 Cael papur Cymro heb "John Jones a ganodd."

Ffordd dda i ohebu yn llwyddiannus ydi
 Disgrifio'r lle fel "pentre bychan tawel,
 Yn gorwedd rhwng mynyddau llawn mawrhydi,
 Mân trwy y gwyrdd-goed troella'r dynyr awel,"
 Neu ddweyd "anaml bydd neb oddiyma 'n curo
 Wrth ddor eich papur clodwiw am dderbyniad,"
 A mynd y' mlaen i draithu ac egluro
 A fyddo 'ch meddwl chwi eich hun a'ch syniad
 Am hyn a'r llall, ac eitha peth, ran hynny,
 Yw son am "sychu'r 'sgrifbin" wrth derfynnu.

Os na cha'r druth (gobeithio y maddeuwch
 I mi am beidio galw'ch gwaith yn llythyr,
 A chredu'r ydwy' rywfodd nad amheuwch
 Fod eisieu parchu'r *gwir*, fel dwed y 'Scrythyr)
 Os na cha'r druth "ymddangos," fel y dwedir,
 Y' mhen yr wythnos, peidiwch digalonni,
 'Does wybod ar y ddaear na chaniedir
 I'r byd y' mhen y mis gael peth ohonni,
 Can's mae yr ystyr wir i'r "dydd o'r blaen"
 Ran amla'n fis neu ddau—na faliwch ddraen.

Ond dyna, hwyrach, ddigon am y tro,
 Rhag ofn i ryw ohebydd daro arna 'i—
 Er nad wy' ddim yn barod, gwyped o,
 I ddilyn Keats er plesio'r gŵr a'm barnai ;
 Ond waeth cyffesu'r gwir i gyd na pheidio—
 (Ac mae cyffesu 'n lles i'r enaid, meddir)—
 Egwyddor a grammadeg ! 'rwy'n ocheneidio
 Fod cyfraith gwlad yn dweyd "a laddo a leddir,"
 Rwy' newydd edrych dros y "newyddiadur,"
 Ac, wel, mae pen ar 'fynedd pob pechadur.

Y TRYDYDD CANIAD.

O, Wlad y Gân a'r Enwad ! pwy na'th welai
 Yn fyg a chain (sef ydyw hynny, hardd) ;
 Bu Natur hael yn afrad pan y'th wnelai—
 Peth od na faget weithiau ambell fardd !
 Y mae dy hanes hefyd, pe'i 'scrifennid,
 Yn llawn o yspryd ac o ymdrech arwyr,
 Mae'n hanes allai ddeffro 'r nwyd gynhennid
 A wnai ein tadau gynt y fath wladgarwyr ;
 Gwladgarwch heddyw sy lawforwyn masnach—
 Mae'r Cymro'n caru 'i iaith a'i wlad yn Sasnach.

A gwr rhyfeddol yw Gwladgarwr heddyw,
 Hynafol iaith ei dadau sy'n ei swyno,
 Fo ddwed o ddifrif mai o Omer deddyw,
 A phaid a'i siarad rhag ofn iddo 'i d'wyno ;
 Fo ddywed hefyd ambell waith dan wenu
 Mai dyma'r iaith siaradai Adda ac Efa,
 A dwed mai hi fydd iaith y gorawenu,
 Gan bob rhyw sant o fewn y'nef gartrefa ;
 Os felly, i'r fan arall yr aiff e',
 On'te fe ddysgai siarad iaith'y lle.

Fo ddwed na ddylid meddwl am benodi'r
 Un dyn i swydd y' Nghymru oni b'o
 Yn medru iaith y bobl y gosodir
 Rhyw ran o'u busnes dan ei ofal o ;
 Os digwydd rhywun wneuthur tro mor wrthun,
 Fe ddaw'r Gwladgarwr, a chan hanner fygu,
 Fo ddwed y drefn yn llym a chwerw wrth yn',
 A thwng fod Cymru wedi ei dirmygu ;
 A phan êl adre wed'yn bron na wyla
 Ar couch, mewn sitting-room yn Saxon Villa.

Fo aiff yn syth i gwrdd y *School Board* wedyn—
 Fo yw'r cadeirydd (er nas gŵyr neb pam),
 Ac wedi cael y gwynt o dan ei edyn,
 Fo ddwg gynnygiad i gondemnio'r cam
 A wnaeth y rhai bennododd Sais uneithog
 I swydd y' nghanol gwlad Gymreig ei thafod ;
 Ar ol i amryw siarad Saesneg creithiog
 O blaid y cynnyg, gan ei drin a'i drafod,
 Fe ddyry pawb ei lais o du'r cynnygiad,
 A pheth ond gwladgar ydyw'r fath ymddygiad ?

Y' mhen rhyw fis y *Board* drachefn gyterfydd
 I ddewis athro newydd ar yr ysgol,
 A dengys yn lled eglur cyn y derfydd
 Ei fod yn cwbl ddallt y pwnc addysgol,
 Can's dywed y cadeirydd faint a gais
 Y lle, a dwed fod eisieu cryn ragoriaeth,
 Ac os ceir Cymro cystal gwr a Sais,
 Fo ddwed y dylai'r Cymro gael blaenoriaeth ;
 Ond rywfodd, Sais unieithog a benodir,
 A'i gymmwysderau i'r cymylau godir—
 (Ac yno yn ddiau 'r arhosan' hwy—
 O leia', welir byth mohonnyn' mwy).

Ond os gofynnwch i'r Gwladgarwr dwyfol
 Paham y rhoes dros ŵr un iaith ei lais,
 Fo ddwed nad ydych ond gwladgarwr plwyfol,
 Mai cadw Cymru i'r Cymry yw eich cais ;
 A phe gofynnech sut y dichon gŵr
 Na ddeyll air o iaith y plant, eu dysgu,
 Fo ddywed ich' y gellwch fod yn siwr
 Nad oedd y *Board*, pan wnaeth ei waith, yn cysgu ;
 Wrth gwrs, chwi fynnech amme'r ateb gwammal,
 Ond—wel, mae'r gwallco'n methu cysgu'n amal.

Drachefn, fo aiff i gwrdd y Cynghor Tref
 (Neu'r "Cynghor Trefol," chwedl y "newyddiadur"),
 Ac yno etto fo a gŵyd ei lef
 Gan dreisio iaith ffasiynol y Pennadur ;
 Bydd yno eisieu gwr i hel y dreth,
 Neu gadw golwg ar fudreddi'r dre,
 A'r Gwladgar etto ddwed mai mawr o beth
 Yw pennu gŵr fo gymmwys at y lle ;
 Ond dyna yw'r cymmwysder goreu allan—
 Rhoi uwch y bobl swyddog na ddeallan'.

Cyn hir, dwed Sais fod Cymru'n ymseisnigo,
 A bod yr iaith Gymraeg yn prysur farw,
 Ond gwyliwch, dyna'r Gwladgar yn ffyrnigo,
 Gan ddechreu curo ar y Sais yn arw ;
 Mae'r hen Gymraeg, eb ef, yn gref a hoyw,
 Ac ni fydd marw tra f'o mor a mynydd,
 Mae arni heddyw olwg fil mwy gloyw
 Nag a fu gynt, rhagorol yw ei chynnydd ;
 Y mae 'n ei siarad filoedd o drigolion,
 A'i dysgu 'r ys i'r plant yn yr ysgolion.

Ni ddwed y gŵr pa sut gall hyd yn oed
 Y Sais caletta'i wyneb dan yr huan
 Addysgu iaith nas gwybu hi erioed—
 Ond beth sy wnelo hynny a Chymru druan?
 Y sawl a fynno'i alw yn Wladgarwr,
 Ni raid i hwnnw geisio bod yn gyson,
 Dim byd ond gwybod enw ambell arwr,
 (Dim draen o bwys am beth y bu'n ymryson),
 Son am y "cymmwysderau" tra thoreithiog
 Y sydd bob amser yn y Sais unieithog.

Chwi ellwch draithu'n ddoeth am enwau llefydd,
 A galw 'ch ty yn London House, neu Villa;
 Dweyd mai'r Gymraeg yw iaith naturiol crefydd,
 A chodi mân achosion Seisnig tila;
 Myn'd i'r Eisteddfod, a dymuno'n dduwiol
 Am "Oes y byd i'r iaith Gymraeg," a throi
 I ddarllen maith feirniadaeth go unrhywiol
 Yn Saesneg, nes bo'r bobol yn cyffroi;
 Chwi ellwch wneuthur hyn yn lled ddidrwbwl,
 A chael eich cyfri'n wladgar wedi'r cwbl.

Chwi ellwch fynd i gwarfod politegol,
 (Mae cwarfod, am wn i, yn eitha' iawn,
 Mae'n fyrrach beth, ac nid yw'n llai mynegol
 Na'r gair cyfarfod, wedi'i roi yn llawn)—
 Chwi ellwch fynd i gwarfod politegol,
 A sôn am "Gymru Fydd" nes troi yn wyrdd,
 (Os dichon i'ch,—a bod yn rhesymegol—
 Dro'i'n wyrddach, felly, nag y'ch wrth eich urdd)
 Chwi ellwch fynd—ond, 'rhoswch hanner munyd,
 Gwnaf bennill arall—gwnaiff y tro'r un ffunud.

Chwi ellwch fynd i gwarfod politegol
 A sôn am "Gymru Fydd" nes b'och yn wyrdd,
 Sôn am ysgolion Cymru 'n ychwanegol,
 A throl i broftwydo pethau fil a myrdd;
 Chwi ellwch wneuthur hyn, a gyrru 'ch arawd
 I bapur Saesneg erbyn boreu drannoeth,
 Fe fydd rhyw "bapur clodwiw" 'n ddigon parawd
 I'w throsi i'r Gymraeg—ai doeth ai annoeth—
 O, botes eildwym! eitha' ffâr i Gymru,
 Mae'n rhattach na chartrefol uwd a llymrû.

Peth hawdd yw canu 'n enbyd o farddonol,
 A dweyd na fydd yr iaith Gymraeg byth farw,
 A lladd yn gethin ar yr iaith estronol,
 Ei galw 'n fain, a'i thrin fu 'rïoed mor arw;
 Ac wedi gorffen y barddonol gablu
 Mynd ar eich union, er eich holl fileindra,
 I ennill cregin heddwch drwy barablu
 Yr iaith ddirmygech gymmaint am ei meindra
 Ond hi 'n ddirwgnach ddigon a lefarwch—
 Enrhyfedd aruthr ydyw ffyrdd gwladgarwch!

Os digwydd rhywun ddangos ei wladgarwch
 Drwy rywffodd mwy sylweddol nag areithiau,
 Cyhuddir ef yn chwap o hunangarwch,
 A bwrir dirmyg arno ef a'i weithiau;
 Os digwydd iddo fod yn w'r coethedig,
 Neud, crochach fyth fydd crechwen y corachod,
 Can's gwag haerllugrwydd hanner addysgedig
 Yw patrwm ucha' coethder i'r conachod;
 A fynno glod Gwladgarwr unrhyw adeg,
 Gocheled ddysgu hyd yn oed rammadeg.

Tydi, Wladgarwch! 'rydwyt fel cyfflogyn,
 Mae'th gorff yn fyrr, ond O! mae'th big yn hir;
 Ai ti yw "noddfa ola'r dyhirogyn?" —
 'Rwy'n ofni bron y rhaid fod hynny'n wir
 O, Gymru anffortunos! pwy a'th wared
 O law y genfaint honno sy'n amlygu
 Eu cywir gariad attat drwy ddynwared
 Pob peth y Sais ffroenuchel, gan ddirmygu
 Dy holl anghenion di a'th gyfleusterau
 Dan rith cyflogi'r "ucha" 'i gymmwysterau"?

Ai oni fyddet lawer iawn cysonach
 Pe peidiet mwyach a'th wladgarol dwrw,
 Pe cym'ret siampl ambell bwt o gonach
 A heliodd bres wrth werthu glo neu gwrw,
 A siarad dim ond Saesneg o hyn allan—
 Pa waeth 'tae hwnnw'n Saesneg go dolciedig,
 Pa waeth pe dwedai'r bobl na ddeallan',
 Ti gaet eu galw 'n ysgentynnod gwledig;
 Ni chai'r Gymraeg—di, gochel beth cyn erched—
 Beryglu mo wastadrwydd gweflau 'th ferched.



PENNILLION PAWB.

Y BARD.

Rhyfeddnodau,
 Ansoddeiriau,
 Coed a blodau,
 A chadeiriau ;
 Ysnodennau
 A medalau,
 Cloi llyth'rennau
 Mewn hualau ;
 Llais fel taran
 Grynnai'r Aran,
 Gwallt hir, tew,
 Fel mwng llew ;
 Hen iaith Gomer,
 Awen Homer,
 Gwisg Herkomer—
 Dyna rai o bethau'r Bardd.

Y CANTWR.

Seinfforch a baton a chôr,
 A chân fach ar gopi mawr ;
 Llais cyn ddyfnd a'r môr
 Neu cyn uchod a thorriad y wawr ;
 Safn all ymledu'n hir,
 Gwddf all ymestyn yn hwy ;
 (Os merch, mae hi'n cani'n bir,
 All hi ddim swnio'r "u," medden hwy) ;
 Croen y sy'n dene sobor,
 Tymer sy'n sydyn fel fflam ;
 Wastad yn ceisio'r wobwr,
 Wastad yn cael y cam,—
 Dyna'r Cantwr.

YR OFFEIRIAD.

Het feddal (rhag brifo'r pen),
 Côt o liw galar tragwyddol ;
 Cadach a choler wen,
 Angau pob teimlad dedwyddol ;
 Credu'r peth fynno, neu fethu
 A chredu dim byd, ond rhaid
 Gofalu, pan fyddo'n pregethu,
 Am wneyd yn ol credo ei daid,—
 Dyna'r Offeiriad.

Y PREGETHWR.

Gwel, dan " Offeiriad,"
 Yn union 'run eiriad—
 Dyna'r Pregethwr.

YR YSGOLFEISTR.

Cansen (un iawn am frifo),
 A phob stwfi i grammio'r co',
 Darllen, scrifennu, a rhifo—
 A thrwydded—a dyna fo
 Yr Ysgolfeistr.

Y GOL.

Y dyn eilw'i hun yn " Ni,"
 Wyr boppeth o dan y lleuad
 Ac uchod, am a wn i,
 I'r diwedd, ac o'r dechreuad ;
 Bascod, siswrn, pot pâst,
 A mwrdwr o bensil glas,
 Yn croesi milltiroedd yn wâst
 A gadael rhyw linnell ddi-flas ;
 Gelyn naturiol pob bardd
 Ac awdwr fynn anfarwoldeb,
 Dyn sydd a'i allu i wahardd
 Yn nesaf i anfeidroldeb
 Yw'r Golygydd.

YR IS OL.

Dyn wedi blino ar tyw,
 Y pennaf o bob rhyw bechadur,
 Mae'n rhald iddo gyfri fel Duw
 Berchennog y newyddiadur
 A'r Gol., a'r hysbyswyr a'r clarc,
 A'r twrne a'r pen cysodwr,
 A druan, ni wneiff o byth farc
 Ar ddim ond ar ambell athrodwr—
 Dyna'r Is-olygydd.

Y GOHEBYDD.

Rhedeg i ddal y tren,
 Crwydro o gwarfod i gwarfod ;
 Scrifennu areithiau'n glen
 Y' mbell cyn i'w hanner ddarfod ;
 Dyn all roi araeth ddwy awr
 I lawr mewn rhyw linnell neu ddwy ;
 Neu araeth bum' munyd i lawr
 Mewn colofn a hanner neu fwy ;
 Trwsiwr grammadeg rhai
 A elwir yn wyr dysgedig ;
 Scrifennwr pwffiadau difai—
 Ambell i waith yn sychedig
 Yw'r Gohebydd.

Y PLISMON.

Y dyn geidw drefn a rheol,
 Ond pan fyddo unrhyw ymryson
 Yn digwydd yn un pen i'r heol,
 Bydd o'n y pen arall yn gyson ;
 Gelyn o galon i dramp,
 A lleidr, a meddwyn, yw ef,
 A chyfaill o stumog tan gamp
 I holl gogyddesau y dref—
 Dyna'r Plismon.

Y TWRNE.

Am urddas y gyfraith y mae
O'n traithu'n fawreddog ei stori,
Ond llwgu er hyny a wnae
Onibai am y rhai sy'n ei thorri ;
Am dd'wedyd ar ddu a gwyn
Mai chi bia'ch eiddo eich hun,
Cewch dalu, a'r gyfraith a'i mynn,
Gryn draian o'i werth o i'r dyn.
Dyna'r Twrne.

Y SIOPWR.

Rhwbio'i ddwy law yn eu gilydd,
Ymgrymu a gwenu'n llon,
Gwneyd i chwi deimlo cywilydd
Wrth gael y fath sylw, bron ;
Wiw i chi son am drafferthu—
Estyn pob peth, deyd ei bris,
A chanmol ei rinwedd, a'i werthu
Rai sylltan o leiaf yn is.
Dyna'r Siopwr.

Y MEISTR TIR.

Moethau diderfyn, segurdod,
Tyddynod, bythynod, a thai,
Swyddi di-waith ac awdurdod,
A'i gyfri'n rhagorach clai ;
Parch a gwarogaeth byd,
A'r cwbl sydd ynddo'n llwyr,
Rhoddod hwy iddo i gyd—
Gan bwy ac am beth, pwy a'i gŵyr ?
Dyna'r Meistr Tir.

Y FFARMWR.

Codi ben bore glas,
 A gweithio hyd nos heb ffael,
 Ymwisgo'n llwm ac yn fras,
 Ymborthi'n brin ac yn wael ;
 Pesci phesannod yn rhad,
 Gwningod a phetris 'run modd
 (Na, wedi'r a'r saethwyr drwy'r wlad,
 Caiff gwpwl o betris yn rhodd) ;
 Peidio rhoi barn drosto'i hun
 Namyn ar gnwd neu ar stent,
 Anghofio ei fod o'n ddyn
 A chofio am ddim ond y rhent.
 Dyna'r Ffarmwr.

Y MEDDYG.

Gafael y' ngarddwrn dyn,
 Edrych yn hir ar ei dafod,
 D'weyd y daw ato'i hun—
 'Doedd y drwg ar y dechre ond cafod ;
 Anfon potelaid i'r dyn,
 A blychaid o beli bach, f'ella ;
 Daw bil wedi hynny, waeth p'run
 Wnelo'r moddion—ai lladd ai gwella.
 Dyna'r Meddyg.

YR ARTIST.

Dyn a gwallt mawr, megis bardd,
 A'i drem agos iawn mor synllyd ;
 Dotio ar bethau hardd
 A llunio rhai hyll ddychrynlllyd ;
 Cael punt ambell waith am werth saith,
 A saith ambell dro am werth punt,
 Ond ran amla' ni phrynn neb mo'i waith,
 A rhaid iddo fyw ar y gwynt.
 Dyna'r Artist.

YR AELOD SENEDDOL.

Gŵr yn gwas'naethu ei wlad
 Gan dalu'n ddrud am fyn'd i fyny,
 A diodde pob rhyw sarhad
 Gan un hanner o'r bobol at hynny ;
 Agorwr basarau, a hael
 Osodwr pob math ar sylfeini,
 A thalwr dirwgnach y draul
 Y sydd mewn cysylltiad a'r rheini,
 Dyna'r A.S.

Y PROFFESWR.

Gwr gwybodusaf y byd,
 A'i farnau yn anffaeledig,
 Nes dengys oes arall fod hyd
 Yn oed yntau yn gyfyngedig.
 Dyna'r Proffeswr.

Y MORWR.

Straeon o bedwar cwrr byd,
 Iaith, os yw'n gref, y sy'n gryno ;
 Nabod y ser i gyd,
 A chastiau y gwynt, gwnaed a fynno.
 Dyna'r Morwr.

Y GLOWR.

Ma'i wyneb e'n llawn o grithe,
 A'i iaith e'n lled fras, ond taw sôn,
 Os yw e'n sychedig withe,
 Myn Jawl, ma e'n biwr yn y bôn !
 Dyna'r Glowr.

Y CHWARELWR.

Gwr distaw a hoff o ganu,
 A fyddlon yw ef i'w gyfundeb :
 Ar hindda bydd, braidd am wahanu,
 Ar ddrycin, fo red at yr Undeb.
 Dyna'r Chwarelwr.

* * * * *

DYDD ANGLADD LLEW LLWYFO.

(DDYDD IAU, MAWRTH 21AIN, 1901.)

'Roedd eira 'r gauaf ar Eryri fân
 Y diwrnod hwnnw, megys mantell wên,
 A haul y gwanwyn, rhwng cymylau'r nèn,
 Ar brydiau 'n chwerthin ar yr amdo gân ;
 Y' meusydd Mon, a chyda choediog lân
 Y Fenai, gwenai gwyrddni 'r gwanwyn mwyn,
 A chân aderyn dd'oi o ambell lwyn
 Pan ddeuai 'r heulwen grwydyr dros y fân ;
 Ond yna llwydai 'r gwawl, ac oddi fry
 Y deuai cawod chuern o genllysc mân ;
 Fe bylai 'r gwynder cain a'r gwyrddni cu
 A chŵynai 'r gwynt lle rhoisai 'r edn gân.
 Ymryson oedd y dydd rhwng gaua' du
 A bywyd ac ysplander gwanwyn glân.

Debycced oedd y dydd i oes y bardd
 Yr oeddym yn ei ddodi yn ei fedd—
 Oes na bu heb ei horiau clær o hedd
 A wisgai 'r eira â goleuni hardd,
 Oes na bu heb y gwyrddni teg a dardd
 O wresog nwyf ac aspri bywyd; oes
 Na bu heb gwmmwl du ac awel groes.
 Ond os, ar ddydd o wanwyn, pan y chwadd
 Addawol flagur mân y bywyd cudd,
 Y delo cwmmwl du ac awel lem
 I lwydo 'r llawr a throï y gân yn brudd,
 Nid anial gwyw, serch hynny, ydyw'r drem,—
 Mae ambell yspaid ferr o heulwen sydd
 A'i gwawl yn troi pob gronyn ôd yn em.

Ac felly, wedi cyfnewidiol hynt,
 Dygasom ef i fynwent Peblig Sant;
 A Natur wnaeth farwnad un o'i phlant,—
 Hiraethus gwynfan oedd y' môn y gwynt,
 Ac ambell ru, fel ffrwst y dyddiau gynt
 A dreuliodd ef; ac yna cwmmwl du
 Yn dod a myned; eithr pan y bu
 Ei ollwng ef i lawr i'r bedd, dros gant
 Y nef ymledodd ffrwd o heulwen lwys
 A roes ar boppeth wawr o burdeb llwyr.
 Ai lledrith gwag yw'r holl feddyliau dwys
 A ddel i'r galon weithiau? Dyn nis gŵyr.
 Ond dir fod rhagor, wedi cymmmain' pwys—
 Mae siriol wawr ar ol y pruddaf hwyr.



LLYWELYN AP GRUFFYDD.

[*"The attempt to secure subscriptions for a national monument for Prince Llewelyn ap Gruffydd has proved a most lamentable failure."*—PAPUR
NEWYDD SEISNIG.]

Mae chwe' chan' mlwydd a rhagor er y pryd
Y cwmpodd ef, drwy ystryw ffals a brad,
Dros freiniau cenedl a rhyddid gwlad—
Amlygiad uchaf bywyd yn y byd;
Ac etto, heddyw, wedi'r aberth drud,
Er maint ŷm yn ei fostio am ein dysg
A'n bâs wareiddiad, nid oes yn ein mysg
Ond cysgod o'r edmygedd hael ei fryd
A edwyn wron, ac i'w enw rydd
Ei briod fawl, heb gymmorth undod trâs.
Ond ef, y dewr, dewisodd angau'r rhydd
Yn hytrach na chaethiwed cerlyn bâs;
Pa ryfedd waeled coffa iddo sydd
Gan oes na phiau namyn yspred gwâs!

Er son am ryddid, pa ryw ryddid yw
Y rhyddid na chydnebydd hawliau dyn
I fyw yn ol ei briod nawd ei hun
Heb roi i arall wasaidd barch, ond byw
Gan wael ddynwared hwnnw? Ai peth gwiw
Yw rhyddid salw gaeth i blygu glin
I'w feistr, ac i fwrw dros ei fin
Ddi-ystyr druth am ryddid dynol ryw?
Ai rhydd yw'r gwr nas gŵyr am aberth drud
Gwroniaid godidocca'i briod wlad?
Ai rhydd yw yntau, ŵyr eu hynt i gyd,
Ond na fynn godi iddyn' wiw goffad?
Na, dyma ffiaidd gaethion penna'r byd—
A hwy yn rhydd, ni haeddan' mo'u rhyddhad!

Y GWRON.

Llafurwr cyffredin oedd Ned Stryd y Nant,
A chanddo wraig ifanc a phedwar o blant.

Un noson fe godwyd y stryd gyda braw
Gan weiddi fod tân yn nhy'r weddw ger llaw.

" Mae'r plant yn y llofft ! " oedd y gri dros y lle,
" A'r fam wrthi'n golchi 'mhen arall y dre ! "

Fe dorrwyd y ffenest, ac yna'r plant bach
Ollyngwyd gan rywun i'r heol yn iach.

" Pwy fentrodd drwy ganol y tân at y plant ? "
Oedd cwestiwn pob un namyn Ned Stryd y Nant.

Pan drechwyd y ffenest, caed colsyn bach du—
Lle gwag yn nhy Ned a ddangosodd beth fu.

Bu cwest, a bu canmol ar Ned Stryd y Nant,
Wrth gwrs, " cydymdeimlwyd a'r weddw a'r plant."

Fe welwyd rhyw ddwsin o weithwyr, dim mwy,
Yn danfon y gwron i fynwent y plwy'.

Ei hebrwng gan fawrion yr ardal ni chadd,
Can's achub bywydau wnaeth Ned, ac nid lladd.

Grwgnachal'r gwarcheidwaid 'mhen wythnos neu ddwy
Fod gweddw mor ifanc yn faich ar y plwy'.

DWY WEDDL.

Bore Sul,
 Wyllo'n hidl,
 Gwyneb cul,
 Hir fel ffdl ;
 Dwfn ebychau
 Am daigneddyf,
 Curo'n sychau
 Wnn a chleddyf;
 Pawb yn frawd—
 Du a gwyn,
 Cyfoethog, tlawd,—
 Duw, rho hyn !

Bore Llun
 (Na ryfeddwch),
 Gwae i'r dyn
 Fynnai heddwch ;
 Rhegwch, dowch
 A'ch dialeddau,
 Brysiwch, trowch
 Bob sŵch yn gleddau ;
 Lawr a'r brawd—
 Du neu wyn,
 Cyfoethog, tlawd—
 Duw, rho hyn !



I'M MERCH FACH YN FLWYDD OED.

Angyles fach wen !
 Deuddeg o fisoedd aeth dros dy ben,
 Blwyddyn heb ynddi ofid na chroes,
 Ac etto, pwy draitha dy oes ?
 Weithion, ni cherddaist gam,
 Ac etto, ti deithiaist hyd
 Y cyrhaedd eneidiau mam a thad ;
 Ychwaith, namyn "dad" a "mam,"
 Nis d'wedaist ti fawr ddim byd,
 Etto, pa iaith o'i chyflawnder âd
 Draithu a dreithaist ti ?
 Mud yw holl ieithoedd y byd i mi
 Wrth a gynnwys gair,
 Nad yw ei lythrennau onid tair,
 Dros dy wefus fach a ddaw,
 A threm dy lygad a thro dy law !
 Chwardd neu wyla,
 Y sain anwyla'
 Yw'th lais a dorrodd ar glyw erioed ;
 Dysgaist im' fwy nag a ddysgodd oed,
 Can's canwyll fy llygad wyt ti,
 A chalon fy nghalon wyt ti !

* * * * *

Y DIRGELWCH.

Adyn wyf o dan afar
 A galar llym ei golyn ;
 Yr enaid grynn hyd ei graidd,
 Nid oes, o fraidd, i'm dwys fron
 Fynydd llon. O f' enaid llyth
 Nid â byth gynhennid boen ;
 Heb lawen hoen, blin o hyd

Ydyw 'mywyd, a'm huan
 A guddiwyd dan bygddu a dwl
 Gwmmwl, a fy meddwl, mae
 Llwyth o wae yn llethu hwn,
 A'r duoer bwn, o'r diwedd,
 A ddug fy hedd, ac o f' oes
 Cysur a ffoes, nid oes dydd
 Dihiraeth o dy herwydd
 Ddirgelwch, sydd o'r golwg,
 Parth da a drwg, parth Duw draw
 Y sy'n neillduaw. Os Ef
 A wnaeth y nef, a'n gwnaeth ni,
 A roes inni ryw synwyr
 Na all ond goleuni llwyr
 O'r fath hwyr fyth ei arwain,
 O! am y gain wawr a 'mgŵyd
 I yrru llwyd haenau'r llên
 Na âd wybod ein diben
 Ar ddaiaren! Mor ddyrus,
 Helbulus hil, heb ole
 O un lle f'm ni. Llawer
 Cred ofer a fu'n peri
 Ein denu ni, dwyn ein hâch
 I dywyllach, tostach tir
 Er ceisio'r gwir—cysur gwael
 Ydoedd cael nad oedd y cyrch
 Amgen nag ofer ymgyrch!
 O! lewyrch bythol lawen,
 Tro'th wên, o'r lle 'dd wyt, rho'th wawl,
 Gannaid wawl, o'r gwag i'n dwyn.
 Er ein cwyn, trueni caeth
 Enbydus anwybodaeth,
 Neu bethau gwaeth, gobaiith gwyn
 Fyth ennyn afiaeth ynnom
 Nad eiddom yw dioddef
 Chwerw hunllef ddychrynlyd
 Gwedi y b'o gado byd!

PA LESHAD ?

*" Canys pa leshad i ddyn os ynnill efe'r holl fyd
a cholli ei enaid ei hun?"*

Son yr ydych am gymdeithas,
Baldordd beunydd am wareiddiad,
Haeru fod rhyw amcan uchel
Yr y'ch fyth yn cyrchu atto;
Er ei fwyn yr y'ch yn gwneuthur,
Pob amryfal waith a ddichon
Llafur llaw ac ymdrech meddwl;
Er ei fwyn yr y'ch yn codi
Eich hysgolion a'ch heglwysi,
Ac yn adeiladu trefi
Lle mae dynion yn ymdreulio
Mewn prysurdeb diorffwysdra;
Gwneuthur llongau a pheiriannau
Heb rifedi 'r ydych erddo,
A dyfeisio fyth a cheisio
Difa gofod, trechu amser.

Diau, gwych yr y'ch yn gwneuthur,
Dysgu dyn y' mhob gwybodau;
Ac nid drwg yw codi trefi,
C'yd y byddon' lân ac iachus;
Gwych yn ddiau, drwy ddyfeisiau,
Ddofi gwyllt elfennau anian,
Ond yn awr, mynegwch immi
Pa beth ydyw'r amcan uchel
Y mae cymmmain' llafur erddo.

Meddech chwithau, " Codi dynion,
" Gwella'u moes a chlirio 'u deall,
" Gwneuthur bywyd ar y ddaiar
" Yn ddedwyddach a rhagorach."

Dyna amcan bendigedig,
 Cyd y byddoch ffyddlon iddo!
 Eithr, sefwch ennyd fechan
 (Dir nad êl y byd yn deilchion
 Herwydd yspaid ferr o seibiant),
 Syllwch ar y gwaë yr ydych
 Yn ei beri, ac ymbwyllwch,
 Chwi, y gwladofyddion medrus,
 Chwi, athrawon a dyscawdwyr,
 Chwithau'n anad neb, offeiriaid.

Onid yw eich mall ystrywiau
 Yn cythruddo gwŷn cythreulig ;
 Oni raid, i'ch diogelu
 Yn eich breiniau a'ch esmwythyd,
 Feithrin pob rhyw ffel gyfrwystra,
 Fagu pob rhyw drais a gorthrech ;
 Chwi ni ruswch yrru dynion
 Lu i dywallt gwaed eu gilydd ;
 Po anfattaf fo'r gymhelri,
 Crochach fyth a fydd eich baldordd
 Am " anrhydedd " a " gwareiddiad."
 Chwi, o mynnwch godi dynion,
 Sut y dichon ichwi oddef
 Yn y druan wlad yr ydych
 Mor eiddigus dros ei hurddas
 Bob rhyw fryntni a thrueni
 Nas gŵyr anwar mo'u cyffelyb ?

Os dyrchafu dynion ydyw
 Amcan penna'r addysg uchaf,
 Onid bach yw ol y dynion
 Sydd yn ffynnu dan eich dwylo,
 Ac yn caffael y llawryfon
 Uchaf a'r anrhydedd pennaf
 Y gall deall byd eu rhoddi ?

Os y mynnech wneuthur bywyd
 Ar y ddaiar yn rhagorach,
 Oni pheidiech ag ymryson
 Ac ymgecu 'nghylch dychmygion
 Res, yr ydych yn eu galw
 Wrth yr enw athrawiaethau—
 Ymgais dyn i ddodi cylchau
 Bach ei feddwl terfynedig
 Am y sydd yn ddiadnabod !
 A thra'r ydych yn ymdderu
 Gyda'ch gilydd, y mae'ch brodyr
 Yn dioddef mewn trueni,
 Ac yn gruddfan am ollyngdod
 Rhag y drwg nas gallan' wrtho,
 Megys rhagddyn' hwy eu hunain.

Chwi a'r amcan dyrchafedig,
 O, drueni ! a raid credu
 Nad yw'r cwblw namyn rhagrith ?
 Onid Moeth yw'r amcan uchaf,
 Onid dyma'r llwybr atto—
 Trecha' treisied, gwanna' gweidded ?

Eithr, meddech chwi, mae cariad
 Yn lefeinio'r byd yn gyson ;
 Ef a gododd bob rhyw noddfa
 I drueiniaid anffortunus,
 Megys tlottai ac yspytai,
 Lle mae Cariad a thosturi
 Yn lliniaru dioddefaint.

Rhoer mai gwir yw hynny ynte,
 Oni ddichon Cariad cymmaint
 Ymfoddloni ar ei ddigon
 Fal y caffo pawb ei gyfran,
 Yn lle rhoddi o'i ormodedd
 Salw gardod rhag difwyno
 Holl hyfrydwch hoedel hefo'r

Golygfeydd yr ydys felly
Yn eu cuddio rhag y llygad,
Fel yr ydys fyth yn cuddio
Pob ysgarthion annymunol ?

Mwya'r llafur, mwya'r dolur,
Goreu'r esgus, gwaetha'r effaith ;
A thrwy nos yr oesau hirion
Mae'r ddiatdeb hawl yn swnio,
" Pa leshád ? "

Ac yn nyfnder ein calonnau
Y mae rhywbeth fyth yn adsain,
" Pa leshád ! "

* * * * *

I'M GWLAD.

*" Und was die innere Stimme spricht,
Das täuscht die hoffende Seele nicht. "—SCHILLER.*

Mae genni gyngor bach i ti, fy ngwlad,
Sef Cymru, canys, er mai bach wyt ti,
Nid wyt ry gyfyng i'm galluoedd i,
Nad ydwyf ddim ond gwr o isel stad.

Ni roed i mi mo'r meddwl mawr y sydd
Yn trafod cyfandiroedd, megys duw,
Yn penderfynnu tynged dynol ryw
Wrth a fo rheidiol er fy moeth a'm budd.

Ni raid i'm chwaith wrth wledydd byd i gyd
Cyn y b'o dichon immi wneyd fy rhan:
Pe medrwn wella cyflwr dim ond llan
Neu bentref ynnot, gwyn a fae fy myd !

Y'ngwawr y ganrif newydd, O, fy mro,
 Ymagor it' mae ffyrdd gwahanel, ddwy,
 A dewis raid i tithau rhyngddyn' hwy—
 Na fwrw ddibris olwg ar y tro!

Y mae a ddywed itti 'n deg eu gair
 Mai ynnill moeth yw amcan uchaf bod,
 Mai gyda gorthrech y mae moeth yn dod,
 Ac nad oes, idd a'i meddo, ddim nas cair.

Y mae a ddywed itti nad oes fudd
 O feithrin mwy y myfyr dwfn a roes
 It' allu gynt i gario llawer croes
 Heb fagu creulon fryd na cholli ffydd.

Na ddewis dithau rodio'r llwybyr du
 A ddycodd bob rhyw wlad a'i cerddodd **gynt**
 I eithaf distryw ar ei halog hynt,
 Can's etto ni bydd amgen nag y bu.

O eisiau gole o'r dirgelwch hwnt,
 Di gredaist hyd wrthuni lawer tro
 Lle nad oedd sail, ond cred ai anghred, O,
 Na ddewis lithrig lwybrau rhagrith brwnt!

Mynn ryddid llawn i'th fywyd di dy hun,
 Ac na warafun gymmain' rhyddid chwaith
 I bob rhyw wlad dros wyneb daiar **faith**,
 Can's rhyddid ydyw trysor pennaf dyn.

Gwyneba ar y byd anhyspys t'wyll
 A'th gred ar dda yn loyw fel y wawr;
 Petae mai anfod fydd y dynged fawr,
 Dos iddi 'n lan dy foes a chlir dy bwyll.

DYHUDDIANT.

(I gyfaill mewn galar. Yn null yr hen feirdd.)

Gnawd deigyr am eigyr mygyr deithi,
Pefr Non, gnawd i galon galar erddi ;
Gwrdd angan, angerdd cynni nis oeraï
Draserch ae carai, caredd eiddi.

Cynhebyg gwynder gwenyg gweilgi
Dan ewyn gorwyn, a'i gorwych dal hi ;
Prid geinwrid gwynros perthi, gruddiau Non ;
Cyfliw bron manon manod llethri.

Graid lygaid lewyrch ser goleuni,
Gne nwyfre laswiw, lliw llachar feini ;
Gwallt eurwiw, lliw llyweli haf, dros fron
Lliw meillion gwynion gwaen a chelli.

Y' medd oer gorwedd gorwen geinfri,
A'i bardd ni chwardd, no cherdd, namyn dyri
O gwynfan, ni chân, chwith gynni ! Nis prof
Ond achreth annof côf corff heini.

Gan serch er gwenferch (gwynfyd eiddi !)
Ys iddo anhyfryd byd bod hebddi ;
Ys cymrawd cymriw fyfi ; ergyd grain
Rhoi is gro a main lliw cain cenlli !

Ys caeth ef o hiraeth herwydd colli
Calon ei galon ; dan gël dodï
Byd ei fyd ; o'i fod hebddi, fardd dyfryd,
Gwerchyd ei gweryd hyd ddihoeni !

PA LE MAE'R UN WLAD FEL TYDI?

Gymru, fy ngwlad, hen gartre fy nhadau,
 Pa le mae'r un wlad fel tydi?
 Llawn o hanesion a hen draddodiadau
 Am ryddid, gwroldeb, a bri;
 Carwn di byth, hen gartref y Brython,
 Carwn di, carwn di'n anwyl tra fytho'n
 Calonnau ni'n serchog,
 Hen Gymru ardderchog:
 Pa le mae'r un wlad fel tydi?

Crwydro bu'm gynt ar hyd dy fynyddau,
 A chwaraau dan gangau dy goed;
 Adgof sy'n bêr drwy feithion flynyddau,
 Yr adgof, ie'r cyntaf erioed—
 Adgof am goed, mynyddau, a bronnydd.
 Blode a nentydd a gloywon afonydd;
 Serch at y rhei'ni
 A lanwai 'mron heini,
 A'i lleinw 'run fath ag erioed.

Gymru fach dlawd? Hyd angau fe'th garaf,
 Nid oes yr un wlad fel tydi;
 Mawredd a geir, hen Gymru hawddgaraf,
 Yn llanw 'th ardaloedd i mi;
 Treuliaf fy oes yn swyn dy chwedleuon,
 Trengu a fynwn yn swyn dy ganeuon;—
 Huned fy nghalon
 Pan ddarffo 'i gofalon
 Yn naear hen Gymru fy ngwlad.

Mwyn yw dy iaith, a phêr dy ganeuon,
 A hen yw dy gestyll i gyd;
 Hir yw dy hanes a hen dy chwedleuon,
 Ond ieuanc yw'th enaid o hyd,—

Gochel ei werthu y' marchnad y gelyn;
 Glân foed dy law i ddeffro dy delyn
 Mwy nid i gwyno
 Ond bellach i swyno
 Hen galon y byd â dy gân!
 Holl enaid y byd â dy gân!

* * * * *

BRAWDOLIAETH.

Hwda am funyd! Wyt ti'n ddyn tlawd?
 Fu dy dlodi di'n destyn gwawd?
 Do? Dyro'th law! 'r yden ni'n ddau frawd,
 Ac mae'n dda gen i weled dy wedd.

Gwn ar dy lygad a'th wyneb prudd—
 Peth garw yw dioddef am lwydo grudd!—
 Fod gofid dwfn yn dy fron di 'nghudd—
 Mae'r meddwl yn 'stumio 'r wedd.

Oes, mae gonestrwydd pur ar dy ael—
 Gonestrwydd! mae o'n beth anodd i'w gael—
 Rhyfedd fod iddo fo daliad mor wael
 Ac yntau mor brin yn y byd!

Fuost ti'n crwydro yn nyfnder nos
 Ar ol caledwaith ar faes neu mewn ffos,
 Heb gân na dim, ond fod llais yn d'weyd "dos,"
 Na wyddet i b'le yn y byd?

Fu'st ti'r pryd hwnnw mewn hiraeth dwys
 Am ddysg a gwybodaeth, a than ei bwys,
 A wylaist ti'n brudd? Fu rhyw goegyn brwys
 Yn chwerthin ryw dro am dy ben?

Do, mi wn, Bu'n chwerthin mewn gwawd
 Llym, am dy ben di, druan tylawd ;
 Mi glywais i'r brath fy hun, fy mrawd,
 Mi wn beth yw min y senn.

Dyro dy law—mae hi'n galed, frawd,
 Ydyw ; pa waeth ? nid yw calon y tlawd
 Ddim yn galed fel maen, nac yn nythle gwawd
 Fel mae calon y coegfalch brwnt.

Welaist ti frawd âg eisiau bwyd,
 Efo'i lygad prudd, a'i wyneb llwyd ;
 Ddarfu 'ti 'i regi'n flin dy nwyd,
 A'i wawdio fo'n greulon hwnt ?

Naddo ! Pam ? 'Rwyt ti'n ddyn tylawd,
 A bu dy dlodi'n destyn gwawd ;
 Do, dyro'th law, cymmer groeso brawd—
 Mae'n dda gen i weled dy wedd !



BREUDDWYD.

Mynd 'roedd y dydd
 I'w wely rhudd,
 A gwawl yr haul wasgare
 Ei gochwridd glân,
 A'i fargod tân
 Ar frig y tonnau'n chware;
 Fe chwarddai brig
 Y laswerdd wig
 Is euraidd wên ei olau;
 A thano, cain
 Oedd blode'r drain
 A meillion mân y dolau.

Yr adar mân
 A'u difyr gân
 O dewfrig goed y glyniau
 Yn swyno'r rhos
 I gysgu 'r nos,
 A gwisgai 'r niwl y bryniau;
 Dan irlwyn braf
 A deilos haf
 Hudolus hûn a'm huddodd;
 Bereiddied daeth,
 Ond brudded aeth
 Y breuddwyd im' ddigwyddodd.

A mi y'nghwsg
 Ar wely mwsg,
 A pherlau mân y gwlyth
 Yn gwlychu 'mhen
 A 'ngwefus wen,
 Anghofais wae; mewn rhith

O'm blaen ar hyn
 Agorai glyn
 A'i gaerog lwyni pêr
 Dan ortho dlos
 Amryne ros,
 Y' mirain wrîd y sêr.

Hyd lawr y glyn
 A'r marmor gŵyn
 Murmurai gwenog nant,
 A sibrwd hon
 Lle llifai'r dôn
 Fel llafar, dyner dant ;
 A'r awel fwyn
 Yn nail y llwyn
 Yn eilio lleddf erddygan—
 Gwefreiddiol gŵyn,
 Cynhennid swyn,
 Mal enaid serch yn sygan !

Y brigog goed,
 Y deiliog goed
 Yn hidlo gwîn a mêl
 I gawgiau mân
 Rhiesau glân
 Y rhosog lwyni cêl,
 Sef cregin cain
 Y môr ; a glain
 Hyd lwybrau glwys eu traed,
 Yn gymmysg â
 Gwawr wen yr iâ
 'Roedd gorne rudd y gwaed.

Dan roslwyn cûn
 Mi welwn un
 A thelyn aur i'w llaw,
 Yn eiste ar làn
 Yr aber gân
 A'r berw gwyllt, di daw;
 A thynnu cân,
 Neud, diai gân,
 Wnai 'i dwylo gwynion hi
 O'r tannau cain,
 Cân, rian fain,
 Wirionai fenaï i.

Coronig dlos
 O ruddain ros,
 Arddunai'r rhei'n ei phen;
 A thros ei bron
 O derlliw tôn,
 Cnwd eurwallt hir oedd lèn;
 Cymmysgai 'i chân
 Ag alaw lân
 Yr awel leddf a'r lli,
 Rhwng lleddf a llon,
 A'r òdlig hon
 Mor hudol ganai hi:—

" O dawel dud
 " Dwyfolaf hud,
 " Dy fywiol falm a'th swyn
 " Ireiddia'r rudd,
 " O galon brudd
 " Tynn golyn braw a chŵyn;

" Rhy'th adar mân
 " Eu llawen gân
 " O'r llwyni gwyrdd, fel hyn ;
 " Alawon llaidd
 " D' awelon draidd
 " I'w dilyn drwy y glyn !

" Murmurog gân
 " D' afonig lân
 " Hyd feini glain a gro,
 " A'i llafar si
 " Y cyngan hi
 " Rhwng cengyn heirdd y fro ;
 " Mae'th eigron têr
 " A'u lleisiau pêr
 " Yn sŵllwys puraf gân—
 " Sain tannau mêl
 " O roslan gél
 " A dryslwyn gwyrdd a glân."

A mi fel hyn
 Yn gwrando'n syn
 Gywreindon syw ei chân,
 Ymdduodd nef,
 Bu taran gref
 Yn torri'n groch, a than
 Y fellten wen
 Yn rhwygo'r nen,
 Chwyrn guro wnaeth y glaw :
 Diflannodd swyn
 Yr oror fwyn
 Yn nhwrw'r fath oer fraw.

Efelly swyn
 Dedwyddyd mwyn
 O hyd y' myd y boen,
 Dros ennyd ferr
 I fyd rhydd herr,
 Fe drydd ei wae yn hoen ;
 Ond er ei fwyn
 Diriona' swyn
 Daw'r hoenus wawr i ben,
 A'r olwg dry'n
 Nos galar du
 Nes gwelwo'r dawel nen !

* * * * *

“POB TLAWD SYDD GYDFRAWD I GI.”

Onid â rhan y diwyd,—holl ofal
 A llafur ei fywyd,
 I'w gwario ar feib seguryd,
 A chadw'r beilch â da'r byd ?

A'r diles yn gormesu,—a moethau
 Amheuthyn o'i ddeutu,
 Y' nghyni dwfn angen du
 Gwronedd tlawd ga' rynnau.

Tynghedfen front, ing adfyd—rydd hi ar
 Ddewrion angenoctyd ;
 A hidla traha'i wawdlyd
 Règ ar ben goreugwyr byd.

YMSON Y LLYW ESGYMMUN.

[*"Yr oedd Llywelyn dan esgymundod, ac ni fynnai ei elynion drugarhau wrth ei luch. Gwrthododd archesgob dynnu'r esgymundod oddiarno, ac y mae lluch Llywelyn, pa le bynnag y mae, eto dan feildith yr eglwys."*—*Erthygl yn "Y LLENOR."*]

"Ys mau gan ddefnydd ymddifanw a Duw."

GRUFFYDD AP YR YNAD COCH.

Esgymmun wyf, am feiddio codi arf
 Yn erbyn gormes draws y Norman balch :
 Mae Melltith Dduw yn tynnu min fy nghledd,
 Yn pylu 'm picell ac yn torri 'm saeth ;
 Mae 'i lid ar warthaf pawb a'm canlyn i,
 A phoenau uffern dân a'u herys hwy ;
 Yr wyf yn herrio Duw i faes y gâd,
 O saif y gair a'm hesgymmunodd i !
 A raid im' wadu'm gwlad a thorri'm llw,
 A gwerthu iawnder fal y prynwy' nef ?
 A ddyry Grist ei râd i ddengyn bâs
 A blycco'i ben i dderbyn cam a gwarth,
 A ddodo 'i warr o dan yr iau rhag ofn,
 Dirmygus lwfrdra, nad oes, namyn carl,
 Na b'ai ddewisach gantho uffern bwill
 Na meithrin based yspryd yn ei fron ?
 A wrthyd Grist ei nawdd a'i râd i'r sawl
 Wrthotto warth a phechadurus frâd,
 A dyngodd gadarn lw i gâr a brawd
 Y trengai cyn y gwerthai 'u rhyddid hwy,
 Na fynnai fwy na chadw 'i briod wlad
 Rhag creulon raib a gorthrech estron traws ?
 Diau ! Esgymmun wyf, ac nid oes frawd
 A eirch ar Fair un arch o'm plegid i,
 Rydd olew im' nac angen pan y bwy'
 Yn nygnaf boenau angau ! Dorau nef
 Nis detgly Pedr borthor, onis rhôf

I draws fy ngwlad, ac oni thorra'i 'm llw
 Neud, dewis agwrdd yw fy newis i!
 Un waith fe roddais i, er traserch gwraig,
 Yn aberth fwy nag a fuasai rhoi
 Fy mywyd erddi—gwae, Elinor wiw,
 Na thyciodd hynny rhag dy golli di!—
 Ond weithian, dewis di, esgymmun lyw,
 Rhwng Nef ac Uffern!

Och! ba chwerw gri
 Oedd yna ger y porth—ai cennad oedd
 I'm rhoi ar ochel fel na herriwy' Dduw?
 Di, lyw y dewis agwrdd, cymmer bwyll!
 Llef etto—le, dolef plentyn yw,
 Mae cri a rhuthyr yn y cyntedd—ust!
 Esgymmun lyw, clyw'r genadwri erch—
 "Brad a chelanedd! wele erchyll waith,
 "Mae'i glustiau wedi eu torri, druan bach,
 "A'i lygaid wedi eu dallu!"

Eppil diawl!
 Bid fyth esgymmun ef nas tanio hyn
 I dynnu cledd a'i drochi yn eich gwaed!
 Mynn cethrau Crist, o phlygaf dan y gwarth,
 I'm herbyn clôed Pedr ddorau nef,
 Naw poethach immi fyddo uffern dân!
 Och, ddewis agwrdd! eithyr bid a fo,
 Myfi lyfasaf nas llyfasodd dyn—
 Od wyf esgymmun, mi a gadwa'm llw!"



CYFIEITHIADAU.

TELYN LLYDAW.

[*Y mae deffroad llenyddol yn Llydaw, a gwyr o ddysg a dawn yn coleddu'r iaith. Trosuwyd y cerddi isod i'r Gymraeg o'r llyfrau y mae fy nghyfaill M. Jaffrennou (Taldir) wedi eu cyhoeddi, sef "An Delen Dir," "An Hirvoudou," a'r "Kanaouennou Brezounek," ac yr wyf yn eu cyhoeddi yma gyda'i gennad.*]

HIRAETHGAN.

("Huanaden.")

Enethig ieuanc a garaf,
 Tyr'd ataf fi !
 Fy nghalon grynn pan welaf
 Dy wenau di.
 Tro arnaf d'olwg lawen,
 Dy lygad glas ;
 Gan im' glywed dy chwerthin
 Mwyna'i flas.
 Fy mhen sy' lawn o bryder
 Gan ofid trwm,
 Sy'n llwydo f' ael, sy'n pwyso
 Fel y plwm.
 Bywiocach di na'r deryn
 Dan heulwen a gân,
 Hoywach nag e' ar ei aden
 Ysgafn a glân.
 Ac yna, fel yr aderyn,
 Gadewi'n brudd
 Fi, druan fab a'th garodd,
 Nos a dydd.

CAN I'R MORWR.

("Kanaouen ar Martolod.")

"Dywed, forwr, gyfaill difyr,
 Red y mor o ben i ben,
 Am ba beth y bydd dy fyfyr
 Pan y'th guro'r waneg wen ?"

" Meddwl byddaf am fy rhian,
 Wylo wrth fy nisgwyl wna,
 Draw yn Lokrist, plwy' Trebrian,
 A fy yspryd ymgryfha ! "

" Mab yr aig, fy nghyfaill difyr,
 Morwr Llydaw, dwed yn awr,
 Am ba beth y bydd dy fyfyr
 Pan ar ben yr hwylbren mawr ? "

" Pan â'r llestr gyda'r tonnau,
 Cofio byddaf bethau fu,
 A fy enaid âd ei gloriau,
 Dianc tua'm henwlad gu ! "

" Dywed, forwr, gyfaill difyr,
 Pan fo'r gynnaau mawr yn ffrwydro,
 Am ba beth y bydd dy fyfyr,
 Tra parha'r llofruddiog frwydro ? "

" Meddwl am fy awr ddiwedda',
 Am fy anwyl fam sy' acw ;
 Erfyn ar i'r Santes Anna
 Fy mendithio awr fy marw ! "

" Dywed, forwr, gyfaill difyr,
 Pan fo't bell o'r wlad a geri,
 Am ba beth y bydd dy fyfyr,
 Pan i'th hamoc clyd y cysgi ? "

" Pan i'm hamoc byddaf ddiddos,
 Cofio am fy nghartre bychan,
 Am y chwedlau ddwedir beunos
 Yno gylch yr aelwyd lydan."

" Dywed, forwr, gyfaill difyr,
 Gwedi rhyw bellennig fordaith,
 Am ba beth y bydd dy fyfyr,
 Ar yr hynt i Lydaw eilwaith ? "

" Am fy rhiaint, fyynnwn weled,
 Eglwys fach fy mhlwy' fy hunan,
 A'r briodas yno drefned
 Rhyngof fi a'm hanwyl rian."

F Y M R O.

("Va Bro.")

Draw mae fy mro yn y pellter,
 Lle na chwytha'r un garw wynt,
 Lle na ddaw na thymhestl na chroesder,
 Na thrafferth na dolur ar hynt;
 Ond gwybren ddisglair sy yno,
 A beunydd dwymder haul mad;
 Ac awel dynner a chwytha
 Dros ddeilos glasgoed fy ngwlad.

Draw mae fy mro yn y pellter,
 Y lle mae cân lawen barhaus!
 O bob pren a changen a gaffier
 E ddisgyn cân edn chwareus;
 Tyf yno y blode prydfertha',
 Liliod hyd lannau y lli,
 Nis ceir, 'mysc y broau teleidia'
 Un fro a fo hafal i ti.

Draw mae fy mro yn y pellter,
 Tu arall i drumau y dôn,
 Mi garwn ehedeg drwy'r awyr
 Hyd atat, fro 'nghalon, yn llon;
 Mi garwn gael dwy asgell fuan,
 Fel rhai y golomen fach wên,
 A thrwy yr ehangder llydan
 Gael myn'd tua'm Bro drwy y nen !

O, Fro, y sy draw yn y pellter,
 Hiraethu am danat a wnaf;
 A phan y b'wy'n cofio dy geinder,
 Och'neidia fy nghalon yn glaf;
 Pryd ca'i tyn'd i'r hen fro a garaf,
 Y fro lle mae serch fy mron?
 Nis gwn! ond am dani meddyliaf,
 Fy Mro, dros ddyfnderoedd y dôn

D Y H U N A N .

(" Da-Hunan.")

Wyl holl ddagrau dy ddau lygad,
 Wyl ar ol yr amser fu :
 Drwy dy yspryd, dod yn fagad
 Y mae hen adgofion cu ;
 Dim cyfeillach, dim anwylyd,
 Colled hwy yn ymdrech bywyd ;
 Wyl ! ac ocheneidia'n druan,
 Canys weithian, 'rwyd dy hunan.

Yn eu henaint, dy rieni
 Nid yn' agos attat mwy,
 Pell oddiwrthyn' i'th drueni,
 Dyddiau chwerw ddaeth it' mwy ;
 A'r nos yn dy wely caled,
 Try dy ysyryd am ymwared
 At dy fam a'th ddug yn fychan,
 Eithr weithian 'rwyd dy hunan !

Unig ! dyna oer a chreulon
 Air a rewa'r galon ddofn !
 Gair anobaith, gair y gofid,
 Gair trueni yw, ac ofn !
 Heb yn agos it' gydymaith
 (Aeth y dôn a'r rheiny ymaith),
 Unig wrth dy dân wyt weithian,—
 Yn dy 'stafell oer dy hunan !

Hwyrach daw diwrnodau teccach,
 Haul tirionach, awr a fo,
 Awr o gariad pur, cywirach,
 Gyda'th deulu, yn dy fro !
 Ar dy delyn, cân, nes delon'
 Gerddi gynt drwy bob gofalon ;
 Cwyna ar dy stad alargan,—
 Ti a'i ceni hi dy hunan !

Y PLENTYN.

("Ar Bugel.")

Braf yw gwel'd y mor a'i dòn,
 Braf yw llewyrch gwybren lòn ;
 Braf yw'r nos, a'r lleuad lân
 Dros y wybr yn lledu'i thân ;
 Braf ynt oll ! Ond mil mwy iach
 Trem agored plentyn bach !

Ganol gauaf, glân yw'r iâ,
 Glân yw blode ganol ha',
 Glân yw'r gwlith ar ddraenen wên
 Ac ar ddeilos glas y pren ;
 Glân ynt oll ! Ond mil mwy iach
 Llygad pur y plentyn bach !

Cain y lili fwyn a gwên,
 Ddŵg y gorsen ar ei phên,
 Cain yw bottwm aur y llawr,
 Leinw'r lle a pheraidd sawr ;
 Cain ynt oll ! Ond mil mwy iach
 Gruddiau gwridog plentyn bach !



MYNEGAI.

						TUDALEN.
Arianwen	8
Beth ?	13
Brawdoliaeth	62
Breuddwyd	64
Canu'r Nos	10
Cysur Bywyd	16
Deio'r Gwas a Betti'r Waen			19
Dwy Weddi	52
Dydd Angladd Llew Llwyfo			48
Dyhuddiant	12
Dyhuddiant	60
Gem	15
Gwlad yr Awenau	17
Gwlad y Gân—						
Caniad cyntaf	26
Yr ail ganiad	32
Y trydydd caniad	36
I'm Gwlad	58
I'm Merch fach	53
In Memoriam, T. E. Ellis	3
Llywelyn ap Gruffydd	50
Molawd Dyffryn Clwyd	4

Morfuidd	18
Non	11
Paid ag wylo, taw a'th gŵyn	14
Pa Leshad?	55
Pa le mae'r un wlad	61
Pennillion Pawb	42
"Pob Tlawd sydd gydfrawd i gi"	68
Serchgan	13
Swyn y Wên	10
Y Dirgelwch	53
Y Gân a Fu	9
Y Gwron	51
Ymson y Llyw Esgymmun..	69
Cyfieithiadau—						
Cân i'r Morwr	73
Dy Hunan	76
Fy Mro	75
Hiraethgan	73
Y Plentyn	77





3 2044 017 963 885



